

桂洲奏議

三四

冊	函	號	類	漢書門
〇	〇	〇	〇	〇
〇	〇	〇	〇	〇
〇	〇	〇	〇	〇

庫	文	閣	內	漢書
三八	函	一	〇	〇
〇	〇	〇	〇	〇
〇	〇	〇	〇	〇

內閣文庫	
番號	漢 8912
冊數	10 (2)
函號	287 39



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



桂洲奏議 南宮集 卷一之二

戊

桂洲奏議 諫垣集 卷三之四

己

桂洲奏議 第三卷

諫垣集卷之三目錄

聽

請差官查勘青羊山功次及處置地方疏
乞發銀賑濟請給關防書吏疏

入青羊山撫諭相度開設大畧疏

改建潞州府治及添設兵備憲臣疏

開設青羊山縣治疏

處置地方以圖久安疏

薦用人才以保安地方疏

懇祈天恩申明屢降勅旨撫諭兵後殘民以安

桂洲奏議

目錄

六

地方疏

桂洲夏文愍公奏議第三卷

聽

門人

涇縣左

鎰

宣城貢汝成

華亭徐

階

武進薛應旂

校正

裔孫

之瑞

重訂其

之琳

浩 瀾 洛 澍

全校字

諫垣集卷之三

兵科題

請差官查勘青羊山功次及處置地方疏

節該河南巡撫潘墳山西巡撫今閒住常道新任右僉
都御史王應鵬及山東副使牛鸞山西僉事陳大綱都
督同知魯綱俱報稱山西潞州青羊山盜賊已平昨自

十月十八日以來浹旬之內各官捷音連十餘上俱各奉有明旨下之兵部但中間獲功緣由前後不一進兵期會彼此各殊然亦詞涉張皇自多戰伐事鮮據實意重希功臣等竊照青羊山之賊本皆陛下赤子生長山谷賦性冥頑所據負罪朝廷原非無故作亂祇緣都御史常道不能審辯於初而率易請兵激成負固之謀及進剿不利則沮畏太過又定招安之計以致賊首陳卿懷姦玩法逞其兇殘憑險弄兵招集黨與殊不知山中居民衆多俱隸縣官里甲其間善良愚蠢豈盡從其所爲卽有獷悍強梁始或聽其號召苟謂一方皆賊實爲

淑慝不分而欲一槩加兵詎免玉石俱碎書曰殲厥渠魁脅從罔治此自古帝王用兵之大法也當時撫按官徂於意見不同偏主撫剿二說殊不知殲厥渠魁是之謂剿脅從罔治是之謂撫貴在並行豈容偏廢若事在得人則滅此而後朝食無難也奈何向來此賊未下各該地方官員寡謀之徒莫不畏蜀如虎貪功之流以爲奇貨可居首鼠兩端莫知從適徘徊觀望坐失機宜以致流毒兩省蓄患經年幸賴我皇上仁覆羣黎明見萬里屢降勅旨深厭加兵憫其無知緩以歲月惟欲吾人悔旣不忍濫及無辜於是止諸路之請兵罷常道之巡

撫仁聲流聞盜賊感泣脅從之徒日圖解散首惡之勢
日益孤危是以乃者三道兵臨一鼓而下蓋久懷悛心
本無鬪志兵威所加降若時雨擒縱惟意如驅犬羊此
實仰賴陛下帝德好生之仁神武不殺之威所致也而
魯綱乃敢誇張戰伐以斬首爲功保薦撫臣以提督自
任大肆欺罔臣切惡之叅照前都御史今閒住常道始
則輕謀妄動輒興兵端既而好事徼功驅民爲盜以致
賊黨勾連遂難解散及至挫衄卽請招安卒之撫剿皆
非恩威並失上煩九重宵旰之慮下貽三省軍民之災
厲皆自誰允宜罷黜但有事以來畏罪懷憂不免嬰心

調度責躬拊已亦復竭力馳驅據其展轉奏陳類非有
心僨事都督魯綱本椎魯武人飛揚暴將久奉朝命遷
延在途方且廣務徵兵虛張賊勢意在大肆殺戮以邀
首功八月初七日綱駐劄潞州不能宣揚朝廷德意乃
大張官軍虛聲以致賊衆驚疑決裂肆出乃於壺關黎
城潞城三縣地方日肆剽掠殺傷男婦燔燒屋廬此時
賊在平地正宜騎兵野戰綱乃頓師安坐竟不能追擒
一賊賊知其無爲却復入山盤據今次進兵之期在初
六日副使翟璣等領兵入山已從魯班壑穿底穿腦尖
綻口至洪梯至陡崖所過賊巢俱已蕩平十之五六而

陳卿父子俱已奔竄谷堆底門樓安陽等處賊巢俱已
丟棄燒毀收降擒斬功已過半而魯綱乃於初八日午
時方領人馬來會於智度寺初九日走據嵩腦賊從山
西路口青羊石返頭等處遁走至十一日賊首陳卿爲
僉事陳大綱所擒十二日陳琦爲副使牛鸞所獲數日
之間不聞綱軍有所調度部下士卒未嘗與賊交鋒今
乃自詭領兵對敵妄稱連日鏖戰斬獲首級二十四顆
意是老弱潰散竄伏谿壑之間以求旦夕之命者京軍
搜捕妄殺報功事同殺降法宜抵死以上二臣皆有罪
可論黜罰之典所宜並加者也及照各官報捷臣等備

將奏內事情逐一磨勘及拘差來人役當面研審所據
近日進兵機宜平盜方畧盡出都御史潘埴經畫至於
刻期入山則副使等官翟瓚等奪險先登搗其腹背摧
陷之功居多牛鸞楊朝鳳等遇敵嬰鋒扼其咽喉收降
之人頗衆陳大綱張羅伏機塞其歸路遂使首惡奔竄
俛首就擒以上各官俱有功可錄旌賞之典所宜先行
者也至若諸路各項官兵深入賊巢戮力用命乘危歷
險百死一生合無不必拘以擒斬之例而以不妄殺人
爲功俱當從厚勞賞以勵人心但查勘前項功罪事干
三省又兼京邊官軍若照常屬之巡按未免彼此隔別

本洲奏議
忠福書院
虛冒難稽紀驗異同事體不一臣愚欲乞勅旨遣差風力給事中一員前去各該地方會同撫按從公覈實明白具奏施行及照自古盜賊稱亂常恃地險以爲巢穴譬之山居豺虎澤萃蛇龍理之常也惟是官府得人制御有道小有萌動卽禁捕之不使蔓延庶免大患今青羊山賊首惡兇黨旣已成擒必須械送京師獻俘闕下明正典刑以昭國家大灋但招收脅從男婦約計不下二千餘人勢難羈縻速宜區處爲今之計欲遷置平地則慮無養贍之資而官給之糧殊非久長之策欲處之故地則仍有險阻可恃而根株不拔難免將來之虞臣

愚欲望特降綸音令差去給事中會同新任巡撫王應鵬親歷茲山遍覽形勢凡舊日盜賊盤結巖谷斬截去處可以刊木通道削險爲夷卽優選委強幹官員起集丁夫赭山斬木務使道路縱橫人馬可以通徃則將收降之人仍令依山便業居住編爲甲伍照舊納糧當差庶幾易於安定斯爲得策若果山險難闢前項脅從黨與不可復令入山恐貽他日之患則當審量地方廣狹踏勘田畝多寡相擇高平原阜建置官府以爲防禦大則設一千戶所小則立二三巡檢司控扼要害長年戍守以爲百年無事之計若可設千戶所則將山間徵糧

木洲奏言
田地計畝從寬起科給與該所官軍依山屯種却將附近衛所屯田抵先酌量數目畧如井田之制分授收降人戶每人田若干隨處安插耕種俾爲永遠世業官司仍量行賑貸以爲廬舍牛種之資若立巡檢司則將附近州縣民間拋業地土分給耕種不許徵糧起科若一處不給則散置各縣地方造冊編管仍以山間田地召募有力無田之人僉充該司弓兵兩項區處似有可行然因時制宜可否裁度又在勅使撫臣從長擘畫必能仰體聖心爲國善計以俟他日上請定奪非臣之愚所能懸斷也又照各該州縣近山居民連年以來被賊殘

害重遭軍旅所經室廬焚蕩田業荒蕪流離失所誠可哀矜欲乞陛下俯垂軫念勅令撫臣亟發倉廩及時賑濟仍行州縣暫免差徭著意存恤則人心感悅地方可保無虞而皇上父母九有之心庶幾少慰矣臣等寡陋之見不能仰窺廟謨然芹曝之誠發自忠耿如蒙乞勅該部再加詳議所貴賞罰允當可服人心計慮深長可弭後患不當循用常調使功罪罔明苟圖便安使貽禍異日則地方幸甚生靈幸甚

嘉靖七年閏十月 日題奉聖旨你每說的是這
起山賊本因官司所激今常道魯綱却乃冒功飾過

就着夏言前去查勘明白分別功罪奏請定奪不許
避難寫勅與他該部知道欽此

乞發銀賑濟請給關防書吏疏

昨該臣等具題前事奉聖旨你每說的是這起山賊本
因官司所激今常道魯綱却乃冒功飾過就着夏言前
去查勘明白分別功罪奏請定奪不許避難寫勅與他
該部知道欽此欽遵臣言伏聞成命無任驚惕顧惟疎
愚謬有論列方懼不達事體猥瀆聖明詎意不棄芻蕘
過蒙采納兼復令臣前去查勘臣感激睿知所當効死
况職思報稱豈敢避難臣專候勅旨頒下遂當即日啓
行但照前項功罪事干多官地連諸省自賊平以來今
已浹月豈能以頓師徒坐糜供億竊計各該官員必且

散歸本省臣今奉命以往祇當直趨潞州必須各處撫按及各項應該聽候查勘人員作急先赴山西潞州旁近州縣各令駐劄先將功次逐一查造手冊候臣到日會集以次呈報以憑勘問覈實庶不遲延時日稽留賞罰其都督魯綱係鎮守總兵官若已回到河間恐不得輒離信地則止將部下領兵官員發來查審乞勅兵部馬上差人分投前去山西河南山東北直隸等處先行知會但臣原奏內欲要亟行賑濟一節未奉明旨伏乞先降德音行令巡撫都御史王應鵬潘瓊預先議處在官相應動支錢糧一面差官解送潞州及近山州縣收

貯候臣到日會同坐委賢能官員給發賑濟被賊殘害貧民并招降脅虜人口使知朝廷特遣近臣遂獲普霑恩渥及照臣奉命查勘軍功事體重大文移四出動關機宜况有題奏上陳尤當嚴於防範乞勅禮部降給關防一顆吏部選撥書吏二名跟隨用使庶幾便於行事臣干冒威顏無任隕越之至

嘉靖七年閏十月 日題奉聖旨都准他禮部便給與關防一顆各該衙門知道賑濟一節戶部便看了來說欽此

入青羊山撫諭相度開設大畧疏

節該臣具題前事伏蒙特旨命臣查勘前月初三日陞
 辭欽奉勅兵科都給事中夏言節該巡撫等官潘墳等
 奏稱山西潞城縣青羊山賊情已寧各來奏捷續該爾
 奏稱都御史常道始則輕謀妄動輒興兵端既而好事
 微功驅民為盜都督魯綱久奉朝命遷延在途未嘗與
 賊交鋒妄稱對敵斬獲等情皆有罪可論所宜黜罰及
 稱近日進兵機宜平盜方畧盡出潘墳經畫并翟瓚牛
 鸞楊朝鳳陳大綱等皆有功可錄所宜旌賞及要處置
 青羊山後來事情乞遣差風力給事中前去勘處朕惟

賞功罰罪必合公論思患預防必須慎處朕以爾之奏
况爾風力可稱特就勅爾前去彼處地方會同各該巡
撫巡按查勘青羊山前項叛賊起自何年是何官員失
於撫捕何官激迫爲亂近日斬獲招降果係何人計處
方畧各該主客官軍孰爲有功孰爲有罪分別輕重等
第照例造冊奏繳以憑陞賞黜罰如常道果有逼民爲
亂妄動生事魯綱果有遷延不進妄殺報功等項情罪
務要從實叅究不許推避容隱就親歷青羊山地方會
同巡撫督同三司等官勘議應否設置衙門開修道路
收降之人應否編甲安插山間田地應否起科開屯原

奏內一切事情俱要區畫停當期於經久可行被賊殘
害地方賑濟存恤等項亦就會同從宜區處應奏請者
具奏定奪應該抽取聽審人員若地方寫遠聽爾於附
近適中去處約會審查爾受茲委任必須盡心竭力熟
思審處務使功罪得實賞罰有據處置得宜保無後艱
斯爾之能爾勿畏憚當求至公稱朕委命如或苟且塞
責罪亦難追爾其慎之慎之故勅欽此欽遵臣仰荷委
寄之重卽日就道十一日至真定府爲風雪凍阻暫駐
二日發行兩省文移先是臣具題欲徑詣潞州令各該
撫按官來會及伏讀聖諭許臣於附近適中地方會官

查審仰見淵衷計慮周悉蓋河南相去潞州限以崇山大河越境從事實爲未便臣乃於二十二日抵彰德府駐劄凡河南各項領兵人員親自審覈事畢卽日放回仍會同巡撫潘瓚巡按譚纘委官覈勘又會審過見監收降生擒賊屬一百五十餘略除真正賊黨取供監候其餘脅虜老幼婦女盡行釋放押送本土安插時值隆寒日報死亡復處給衣糧少能全活一面差官查審修武林涉等縣先前被賊殘害地方及近日安插收降人口分投賑恤首尾半月事頗就緒先該臣差人齎文山西約會巡撫王應鵬帶領三司等官俱來青羊山先行

踏勘應否設置衙門開修道路遵照欽諭內事理亟圖善後之計約會巡按穆相前來潞州會勘平賊功罪外臣於本月初六日從彰德府取林縣路入山初九日抵花園口卽前日河間進兵之路實係山西地方至則三司及守巡官俱到始知都御史王應鵬丁憂是實御史穆相以交代不至臣遂同叅政邵錫僉事賈啓都指揮王朴及分守叅政李際可屯田僉事楊朝鳳原領兵都指揮霍錦次日一同進山初十日至王陡崖十一日至谷堆底卽首惡陳卿所居十二日至青羊村卽前日賊徒奔潰之處十三日出山至潞城縣十四日至潞州凡

經四宿山中周覽五日其山川阨塞道路險夷村墟井
落攀緣上下一一皆經心注目惟青羊一村人民頗衆
山水環合風氣翕聚土地沃衍所宜開設縣治堪以居
養人民臣嘗讀堪輿家書亦畧領其意義隨以羅經立
定方向凡縣治學宮文廟城隍及各項大小公廨街渠
門巷城垣道路俱各督同知州周昊畫定規模建以標
準三司等官對面商確僉以爲善及詢叅政李際可則
知都御史王應鵬御史穆相於賊平之後臣未至之先
亦已到山相度與臣所擬相同其在河南地方應立城
堡者三處在山中應立巡司者三處道路險絕宜開修

者十餘處及思患預防事體重大者尚有別項建議俱
容臣逐一計畫停當隨即具奏但照山西及各路領兵
官員招降擒獲脅虜各項人口卽今俱不在官已經都
御史王應鵬委官盡行放入山中安插已畢臣昨經山
中之日凡係平日脅虜良民及近日河南經臣放回者
老稚男婦俱各焚香跪謁自幸生命宛轉哀號訴其冤
苦其少壯有力者俱爭相與臣負輿褰衣亦皆哽咽感
激但其間真正賊黨前日拒命之人仍舊潛匿不肯出
見心懷疑懼反則不安地方人心亦甚洶洶一則以爲
吞舟漏網憤懣不平一則以爲蓄癰養虎慮有後患臣

密加偵訪殊切憂虞且今日山中之人凡有四等有係
平民不魯爲盜近爲官兵招入投降之數者有本係良
民被賊汗脅而近日收擒者有實爲賊黨而潛匿山谷
不會爲官兵所獲者有爲官兵擒獲而復放回安插者
大率約計男婦不下數千餘人而壯丁尚以千計卽今
室廬器用盡已燒燬困窘米粟盡已掘發牛羊頭畜盡
已奪去貲產蕩析生理窮蹙踈伏空山寄命無所爲惡
者兇頑之性未革被害者忿怨之氣方新哀今之人豈
可使之一朝無食而坐以待斃哉又可窮治逋誅而決
其無聊之計哉况今兩河之民流亡載道一山之隔呼

號相聞將來之虞惡可不慮臣昨抵潞州卽日庭集官
僚宣示朝廷向來德意止嚴首惡之誅而脅從者皆在
所宥天恩浩蕩又發帑銀通行賑卹無所係吝博施同
仁加惠元元之意今日之計賑卹爲先臣於是委叅政
李際可僉事楊朝鳳帶領同知倪最判官會復知縣王
密王欽李朝綱主簿谷景暘重複入山沿村遍落查審
各項居民逐戶大小男婦備細籍記給以丁口小票親
執赴州領賑被賊殺入劫財之家經兵騷擾貧民及收
降脅虜人口各立條格銀數有差出給曉諭賊黨撫安
良民告示入山散給各村張掛賑濟之後另給欵宥良

民關防票帖人執一張以杜後禍連日次第舉行人心
翕然始定在山居民聞臣欲奏設縣治亦復歡欣鼓舞
自幸賊巢之名可以湔洗則其善端之在人心未嘗泯
沒然此事終始皆賴我皇上一念之仁上同堯舜而臣
以愚昧誤蒙驅使何幸藉手得以少效心力不然則今
此之民化爲白骨久矣尚忍言哉及照查勘功罪一節
除都督魯綱發來指揮鮑鼎等陳僉事所領三關官軍
指揮曾宣等牛副使所領千戶劉岱等俱經面審發回
外查得各官功次文冊俱各漫無月日地方可考而取
降人數間有全無花名混開男婦若干名口者已經會

委叅政邵錫等從實覈查但欽奉勅諭處置地方事宜
令臣會同巡撫分別功罪令臣會同撫按官今王應鵬
以下憂去穆相以交代去而新任巡撫新差巡按俱未
可旦夕而至然臣於撫按衙門先已會同有行况臣係
奉命人員事有專責今逐項事情臣俱已會同三司多
官悉心區處計在正月可以竣事一併造冊具奏定奪
所據臣撰述欽宥由帖及出給通告示冒昧上塵伏希
睿覽臣無任戰慄隕越之至

計開

欽宥帖文一紙爲撫安良民事審得爾等俱係良

民被陳卿等恃險集衆拒殺官軍犯罪深重朝廷遣將用兵始克剿平今首惡既擒收降脅從俱遵照屢奉欽依悉行赦宥爾等自今以後各務農業各安生理教訓子孫遵守禮義再不得犯法爲非外方流民再不許窩藏容隱其舊日黨卿爲惡者今既收降俱與湔洗不復追究除已行賑卹外仍行官司暫免差徭爾等各宜感戴天恩革心向化永爲太平之民不許仍以賊情互相攀摻告訐爲此給與良民由帖執照以絕後禍如無此帖卽係不肯歸化之人自罹法

網其毋後悔須知帖諭者

告示一道爲曉諭賊黨撫安良民事竊照青羊村一帶地方山谷深險民性兇愚兼以官府隔遠教令不及百年以來號爲盜區訪得中間不逞之徒糾集羣夥時出四外行劫隨復入山潛匿又有外方賊徒亡命遁來山中聚爲淵藪祇因一向有司不得其人失於撫捕甚或交通隱蔽以致醞釀爲患漸染成風但山界兩省地連三縣縱橫延袤不下百里村井連落居民實繁豈必家家是盜人人是賊止是陳卿一家但爲主

首所聚兇黨不滿百輩官司留心撫處設法緝捕何所不擒近因撫臣輕率用兵寡謀失策自損威重以致賊勢坐大日肆猖狂朝廷不欲加兵深恐害及良善而賊卿頑獷不服迫脅居民依險拒敵竟煩大兵併力進剿今首惡雖盡俘獲餘黨尚有逋逃非賴皇上節有撫剿之旨則前日縱兵肆殺爾等種類無遺今既苟全性命俱當改過自新賊平之後皇上又念近山居民被賊殘害經兵騷擾收降脅虜人口家產既破衣食無依特發官銀通加賑卹當職祇奉上命

而來專爲布宣朝廷德意撫安地方除已委官分投入山查審各項丁口以憑賑給爲此先行曉諭爾等凡前日爲惡賊黨既已收降卽同脅從俱從寬釋通不追究脅虜人口既已復業各安生理遵守官府約束被賊殘害貧民亦宜含忍痛苦不得修復舊怨構啓釁端除賑給外仍與奏請開設縣治建立學校治以法令訓以詩書仍暫免差役三年待委官造冊到日別有告示散給銀兩爾應賑之人但依限定日期赴州親領就行給與良民票帖執照以杜後禍今後

山中之人再不得出外爲非四外賊徒並不許
容留居住州縣姦豪之徒平日與賊交通託爲
腹心耳目者自今痛宜謝絕各保身家爾等當
上感朝廷曠蕩之恩下爲子孫長久之計爲盛
世之民享太平之福豈不幸哉嗚呼化虎狼爲
善類變鴟梟爲好音此聖天子一視同仁之心
哀矜勿喜之意也咨爾官民共宜知悉

嘉靖七年十二月二十四日題八年正月十八日奉
聖旨該部知道欽此

改建潞州府治及添設兵備憲臣疏

節該臣先題奏事欽奉勅爾受茲委任必須盡心竭力
熟思審處務使功罪得實賞罰有據處置得宜保無後
艱斯爾之能欽此臣本非才蒙荷重托夙夜祇懼思以
仰副聖心凡所以爲地方善後之計者無不博訪羣情
殫竭愚慮除開設縣治事宜具題外卷查先因潞州儒
學生員孫濡江相等并致仕官李珍等宣化等坊都里
老郭琦等連名具呈欲要改州爲府該臣批行山西布
政司等衙門守巡冀寧等道看得潞州地勢雄勝城郭
宏壯民物殷庶居然河東巨鎮考之前代雖因革靡常

然皆爲軍州爲府路古稱黎國潞子皆其地也今屬以一州似乎建置弗稱統御爲難近年兵興盜起有由然矣方欲有所咨詢適學校諸生林下鄉宦及里老人等連名具呈議論畧同並關政體具可采錄又况澤潞古今要害太行之險雄跨中原中間長林大谷蛇虎所都加以宗藩設邸軍衛列屯兵備憲臣似亦不可少者合行該道會同都司多官僉議可否務合人情有裨治體以憑聞奏施行去後今據左右叅政等官邵錫李際可等會呈前事行據汾州等州知州郭鏗等會同太原府通判宋邦熙潞州等州知州周昊等高平等縣知縣管

律等勘得潞州地方廣闊城郭宏壯民俗疆悍人多好訟山川險阻盜賊藏伏兼以宗室繁衍每生事端軍衛雜處甚難治馭知州品位頗卑同知等官出身不由科目識見亦爲有限是以連年多事居民稱擾士庶官民俱連名具呈欲改州爲府揆之事體委的相應又看得澤潞等州去省頗遠府官職司綜理民情難兼整飭戎務守巡官分理他處按治不常遇有警急輒難卒至近日青羊山之盜兵連四省財費萬計蓋有其由合應添設兵備憲臣一員在此駐劄修治武備兼管分巡庶國威振而人心自懾盜賊弭而境土永寧等因職等會議

得今之潞州古之上黨仰惟國朝初設州治民純事簡
政令易行奈何近年以來宗藩強大生齒浩繁風俗頑
悍獄訟蝟興及今若不因時改置誠恐豪強之勢日盛
刁頑之習日深甚非更化以宜民也且澤潞等州皆宗
室封藩之地恪守祖訓而深居不出者固有好生事端
而較轍有司者甚多加以軍衛雜處頡頏難制小則媒
孽州官之短大則挫抑州官之威政令不行率多坐此
若知府勢位尊嚴人心畏憚較之州官不侔遠甚宜卽
改州爲府斯爲執要御煩况生員人等所呈與知州等
官所議衆口同詞合無依其所擬將潞州改置爲府俾

澤遼沁汾四州長子等一十七縣皆在所屬與太原平
陽大同三府並列而爲四庶體統一而政令行官位尊
而強悍服而又增縣治以分理民事添學校以疏通人
才如此則風俗丕變教化大行釁端不生而盜賊亦不
起矣又議得青羊山賊負恃險固招集強梁爲患不止
一年動兵連及三省揆厥所由蓋以守巡官更代靡常
撫捕無策以致釀成今日之禍尚可晏然而莫之處乎
合無從長議處添設兵備憲臣推選素有風力才識威
足以懾人智足以應變者一員常用在此駐劄整飭武
備兼管分巡仍將澤潞等五州并屬縣邊操民壯奏請

學回本道聽其分班團操練習如此則風紀大振良善
免魚獵之虞軍威丕揚姦惡消狗鼠之念事體兩得民
可久安等因到臣叅看得各官議勘與臣所見相同竊
惟自古帝王爲治建邦立都以宅中圖大又必隨地之
形因民之俗衆建郡國以分理之使小大有所相維遠
近得以附屬於是乎又察山川之形便地里之要會建
爲州牧方伯以提挈綱領爲國楨榦夫然後紀綱有統
條目自張上德下情有所宣究文事武備足以威附而
國家賴以長治久安唐虞三代之制固已然矣漢唐宋
之世鮮不因之至於祖宗之有天下建邦啓土張官置

吏治內治外尤爲明備可謂度越前代矣然一統之大
廣輪之博中間有經理未及建置未稱者則又在乎聖
子神孫繼明紹休有以振起而恢拓之此潞州之事所
以有待於陛下也伏惟聖明特垂意焉今將建置緣由
區畫事宜逐一開坐具本謹題請旨

計開

一潞州在禹貢冀州之域堯都平陽爲甸服春秋
時爲黎國爲潞子國秦罷侯始置上黨郡漢晉
魏因之在宋元爲隆德府至我朝洪武元年以
上黨縣省入是爲潞州領長子屯留襄垣潞城

木沙奏言

忠節書院

黎城壺關六縣而直隸布政司然其地極高與天為黨因名上黨山川峻險地里遼曠盤踞太行之上為天下之脊當河朔之喉東帶鴈門寧武偏頭等關屹然為京師屏蔽蓋古今要害中原必爭之地也昔人謂其地險固其民堅忍其俗節儉其兵勁悍王者不得不王霸者不得不霸猾賊得之足以致天下不安其地勢風俗使然也唐元宗為別駕於此李抱真為節度於此其為雄藩巨鎮從來已久宋太祖之得天下也以先取澤潞及其末也以先失河東則此地之

關係安危非細故矣臣初抵潞觀其城郭宏大民物殷庶街衢廣衍西北諸郡鮮有其比况以盤石之宗日益繁盛自瀋簡王位下今分封為陵川等王府者十有六為鎮國府者六十有三為輔國者七十為奉國者二十有二有潞州衛有瀋陽護衛兵民雜居錢糧甲兵獄訟各項事體重大今屬以一知州官秩既卑權力有限縱使才能亦難展布誠不足以禁制姦豪抗抑權勢佐貳之職類皆雜流末品殊不足以分理政務宣布德澤兼之僻在一隅上司大吏按部有

桂州奏義

卷之三

二十一

忠豐書院

時力小任重付託弗堪是以教化不行法令不振比歲青羊山蛇鼠之盜遂不能制頗費支吾萬一更有意外則官府束手宗室震驚恐不免重貽朝廷大憂爲今之計改府立縣誠有不可緩者况稽之衆論允合詢之人情大順諸王聞之亦復欣然同願蓋將來利害不待智者而知但無人爲陛下言者倘蒙采納乞勅該部再加詳議亟賜施行則地方可保安寧而足以翊衛我國家億萬年丕丕之基矣詩曰貽厥孫謀以燕翼子伏惟聖明遠覽而深念之宗社幸甚

一潞州城周廻一十九里廣三丈高三丈五尺代更歲久無人以時修葺土剝落間有關陷中穿之處遂成徑竇人畜可通往來晨夜無所防禁本衛雖有指揮一十六員鎮撫千百戶共七十員率多闕茸非才太半緣事原伍旗軍五千七百九十四名而逃亡事故者三千三百餘名三關輪班操備二千三百五十五名而不赴者常半騎操馬一千二百九十八匹見在者八匹而已武備廢弛未有甚於此者夫以軍城重地百萬生靈鱗集蟻附宗藩邸第碁布星羅府庫

錢糧積鉅萬計而城池弗固武備不設蕩然無
守警之巨富之家金帛盈積乃獨居曠野無垣
墉扃鑰之固無子弟奴僕之強無挺刃器械之
防而主人又復孱弱不振如此而不爲盜賊所
窺者未之有也昨當山賊猖獗之時城中宗室
大家俱欲鑿壕自防倉皇無計念之可謂寒心
今山賊雖平人心未定近日諸領兵官召募鄉
夫鄉導人役凡爲官府出力以捕賊者往往與
山賊構爲讐恨釁連禍結紛紜纏糾莫可究詰
加以開設新縣修闢道路工役重大有司無所

稟呈必須添設兵備副使一員常用駐劄本州
專一提督開創各項衙門整飭戎務修理城池
安撫良善鎮壓姦宄俟三年之後事體寧一方
令帶管該道分巡如此則委任專而事功易集
權力重而地方可保無虞矣伏惟聖明留神特
賜裁納臣愚不勝惓惓

一府治之改衙門廨宇一無所更其正堂棟宇高
大軒豁皆前代創構凡百規制不煩增拓惟欲
添蓋經歷照磨兩廳及各官私宅四所左右隙
地綽有餘基其縣治及兵備府則有上黨縣舊

址三十餘畝又有潤德麗澤等里空地三百餘畝皆在城內可以相度創建既無妨礙民居亦不須用價置買所據各項土木工程大約費銀可五千兩而足查得本州見收商稅銀實有五千餘兩在庫合無准令動支買辦物料僱募夫匠儘勾經營不須科索民間一錢不致起倩民間一役况礮石伐木燒造甄瓦事事近便不數月而諸務集矣但附郭縣學待人才既盛又議開設今宜如順天府例該府驛遞因不係衝要似爲虛冗宜如徽州府例俱不須設其所屬則

當以遼沁汾澤四州并屬縣及該州原轄長子等六縣并新議附郭開設二縣凡二十三處俱入隸則可居大原平陽之次比之大同則已過之又屹然關南一大郡也恐議者已爲諸役並興不免勞費故臣敢不避煩瀆輒獻其區畫之詳如此伏惟聖明裁斷

一兵備之設專主防禦然無可握之兵猶不設也查得山西邊操民壯原非祖宗舊制始於正統年間編僉太原府額編六千四百一十二名平陽府額編八千八百三十三名澤潞遼汾沁五

州額編五千九百一十一名通共二萬一千一百五十六名分爲三班輪赴偏頭鴈門寧武三關操備及修築隘口原因已巳之變邊關有警建議編僉無警放回至正德年間提督憲臣議令分番操備遂成長年戍守無復休息今山西通省民力困於此役數年以來幾不堪命矣臣聞各州縣應民壯者輪及該班或鬻田產子女或貨家具耕牛以給路費一次往返動經半載一夫耗費奚啻十金則二萬之衆常年所費不下數十萬計重出於田糧科差之外又無月糧

布花之給其苦數倍有甚於軍況到邊關亦不能折衝禦侮徒滋包辦役占之弊其貧無力者則勒令修築拔草備極苦楚班滿之日空有皮骨而已前項民壯之役誠無益於邊備徒有損於邦本臣愚以爲潞州改設兵備合無將澤潞遼沁汾五州并所屬州縣民壯盡數掣回蓋三班輪流其常用駐邊實數止是一千七百名在邊關有無不爲加損而取聽兵備官調集潞州操守則修補城池防禦盜賊建設衙門皆得實用而民亦歡然樂從如蒙乞勅兵部查議特賜

允可實爲便益并通將該省民壯盡免邊操而
止令於本處官司管領操練以爲內地防禦俟
邊關有警聽調則山西之民困庶幾少蘇仍乞
併勅該部查究源委斟酌利害輕重定議可否
以俟聖明裁斷臣不勝幸甚

嘉靖八年正月廿八日題二月十二日奉聖旨該部
看了來說欽此

開設青羊山縣治疏

臣節該欽奉勅就親歷青羊山地方會同巡撫督同三
司等官勘議應否設置衙門開修道路收降之人應否
編甲安插山間田地應否起科開屯原奏內一切事情
俱要區畫停當期於經久可行欽此欽遵續該河南巡
撫潘墳題爲處賊巢以杜後患事奉旨該部知道通行
到臣仰被明命伏稟聖訓夙夜究心躬親從事先是臣
會同山西巡撫王應鵬河南巡撫潘墳選委三司都指
揮等官王朴等到來臣自林縣入山率同多官遍歷青
羊山地方躋攀危險陟降原隰逐一相度惟青羊村相

應建設縣治與都御史御王應鵬所見相同臣復與三司等官對面商確衆議允諧臣猶恐一人聰明有限况事關重大久遠必須博謀慎處復案行兩省叅政等官邵錫等再加從長議勘去後今據叅政李際可僉事賈啓等呈稱行據潞州等州知州周昊等高平等縣知縣管律等勘報會呈到臣叅看得青羊山一帶地方東西相距一百餘里南北相距一百四十餘里山連萬疊水分兩河村落頗多生聚甚衆遠者離縣一百餘里近者離縣八九十里官府法令難及上下情意不通中鬪強獷之民往往出山潛行劫掠四外流來之賊往往入山托爲

窠巢是以涇渭同流薰蕕一器積成逋逃之藪號爲盜賊之區昨年賊首陳卿乃敢憑負險阻拘留命使糾集徒黨敵殺官軍事雖起於激成罪有同於謀叛茲者仰賴陛下堯仁徧覆湯武用張兇渠旣已殄滅脅誘盡獲生全殘害者蒙被賑賚之恩首降者執領欽宥之帖羣情感激地方稍寧但及今暇日不爲善後之圖恐將來餘蔓未免復萌之患所據建設縣治學校巡司關隘軍堡等項貴在旦夕舉行勢不容緩伏乞聖明留心采聽下之該部會議早賜施行則地方生靈幸甚幸甚今將處置區畫各項緣由逐一開坐具本請旨

計開

一應設縣治一處臣看得青羊村東抵林縣界八十五里南抵壺關縣界六十里西抵潞州界四十里東南抵花園村并林縣界一百三十里西北抵潞城縣界四十里東西相距一百里南北延袤一百餘里居民一百餘村曰山南莊張井葛家峪臘江水栢木都臭水交梯頭拐裏梯後江底海會寺槐樹坪白蘭岩蘆芽亦水棒家窖饅頭纏此其東路村也曰石坂頭屹臺池底東峪溝串底寨裏陸泉溝申家坪王莊車箱此其

南路村也曰崇岩鑰匙水東郊裏欒莊谷堆底塌峪裏智度寺軍寨門樓安陽虎窠鞍子嘴西灣西窠黑虎裏羊圍子此其中路村也曰大坂頭羊井白黃馮善黃沱長井石橋壺神頭此其西路村也曰上五井中五井留村李莊上黃下黃南留西留神頭嶺此其北路村也諸村皆僻在萬山之中深林窮谷道路崎仄山石犖确人跡罕至惟是青羊村風氣開豁山溪縈帶蓋大山之脚隨水東出去而復回順勢成逆結成堂局水從右而左纏元武者二十餘里案山列如

屏障兼主山秀特蜿蜒頓伏藏風聚氣可以扞
立縣治生養民物東達林縣西直潞州南可以
控制谷堆底虎窰西灣之要害北可以通黎城
壺關之通衢得形勢之便利據險害之腹心四
達之道里適均經商之往來稱便查得壺關縣
原額編民九十七里其新興三里四里安化二
里安善一里二里三里遷善一里二里代寧一
里二里共十里俱在青羊村之南路城縣原額
編民九十七里其青羊里王莊里張井里上五
里葭蘆里新安里東谷里東五馬里廣裏里東

禪南里東禪北里東禪東里三池南里三池北
里侯壁里留村里共十六里俱在青羊村之東
北黎城縣原額編民四十五里其豆口里石城
里單東里王曲里石灰里共五里俱在青羊村
之東三縣共三十一里俱各相應分割填補以
立新縣其學校縣址及大小衙門壇廟城郭街
道俱各有相應建置地步若於此立縣將來民
物必須繁盛而人才亦或挺生意者山川靈氣
將發洩於聖朝而必假兵寇以啓之也臣先日
建議欲設千戶所殊不足以約束且或別生弊

端况無可撥之軍亦無可屯之地惟是立縣則有官府舉法度以制姦豪有師儒興禮義以化聾瞽庶幾後患可弭而火安可圖矣伏惟陛下特賜裁斷

一應設巡檢司三處臣看得青羊村東南約行五里地名崇岩林木蒼蔚崖壁巉巖棧道石磴蛇盤斗打行六十里至智度寺寺西旁隔一小山爲谷堆底卽陳卿所居寺址負山瞰河谷邃境僻南接羊圍子鎮橫帶西灣虎窠盜賊多居於此東行四十里至王陡崖接桃源花園口山中

諸路交會於此北去三十里地名柏木都又十里至洪梯連接槐樹坪白蘭岩去縣益遠而兩省人民雜居於此臣欲卽智度寺改爲蟠溪峯立一巡檢司以據賊巢之心腹卽王陡崖改爲玉斗崖立一巡檢司以防山賊之外出卽柏木都改爲白雲谷立一巡檢司以防流賊之內入合無照例銓官撥吏每司就於新立該縣僉點弓兵各一百名令其常用盤詰往來巡視仍嚴加禁約今後山民敢有不改前非仍爲盜賊就便率領司兵號召山間良民併力擒拏撲滅各

處流來面生可疑及趨食僧道一應無支引之人俱不許擅入山場容留居住本山之人亦不許爲僧入道私自剝立菴院巡司官兵人等敢有貓鼠同眠縱容隱匿以致仍前爲非釀成禍患者許巡按御史并按察司分巡官體訪拏問如律如此則控制有人而流亡不敢入聚關防嚴謹而盜賊以自潛息矣

一應設關門二處臣看得風門口在萬山之巔連崖疊巘亘如長雲忽兩山中斷開一峭峽如劔劈然東下石路陡絕縈紆十二里至花園口抵

河南林縣界西來廻繞山脊陵十八盤過麥積山旁瞰無底之壑仰逼雲日乃太行之脊是爲山西壺關縣地方臣欲於此處設一關門立名玉峽又北去百餘里山名洪梯石磴齒齒盤迴霄漢四圍懸崖立壁嶄巖如削直至絕頂始開一峽口狀如風門而小鳥道橫亘上凌青旻望之若虹霓然臣欲於此處設一關門立名虹梯以上二處皆河南進兵之路向來羣賊據此以拒官軍者也此實險阨要害之地前此官府不爲設守反以資寇合無伐取本山之石結砌關

門加以樓楯固以扁鑰玉峽關則以玉斗崖巡
檢司守之虹梯關則以白雲谷巡檢司守之如
此則丸泥可封萬夫莫敵足以壯形勝之觀足
以奪盜賊之氣不徒爲山民一時之計且可爲
中原巨盜之防矣

一應開修道路八處臣看得自崇岩至谷堆底路
一條合修三十餘里中有深澗二處山水暴漲
人不得渡宜作橋梁二所林木又極茂密宜加
斬伐立石突礙處宜鑿磴道崎仄處宜闢洪梯
至柏木都路一條除可堪經行外中有二十餘

里與崇岩谷堆底大畧相似七里穿至花園路
一條十二里俱土山戴石突出離立極爲陡絕
逼礙宜大加修闢務令車馬可通青羊至潞州
路一條該修二十餘里智度寺至魯班壑路一
條該修三十餘里七里穿山南底至李莊路一
條冬春水乾沿河底而行夏秋潦水成川夾崖
有路而小俱是土山易於修治黃松嶺至谷堆
底路一條乃指揮秦洲敗績處險路二十里青
羊村至神頭嶺路一條險路三十餘里中間山
勢險峻大石阻礙去處俱動支官錢募夫開鑿

其土山路小而止須闢廣者責令各村鄉夫照界用力平治以上八路既通則山中無可恃之險而盜賊之謀自消阻矣

一河南林縣地方應設軍堡三處臣看得該縣西阻太行山一帶皆層崖峭壁屹如崇墉惟有三路通青羊山一路爲花園口一路爲尖綻口一路爲魯班壑往者青羊之盜流劫河南修武林涉等縣由此而出昨者河南大兵進剿由此而入蓋兩河三晉之交阨塞要會之地也我太祖高皇帝命韓平章攻蟻尖砦盜亦嘗勞師三年

既而克平乃遷彰德衛一千戶所入守後復移置林縣今爲林縣守禦千戶所近據本所千戶鄭鏜呈稱該所軍四百名輪班京宣操備缺人城守查得山賊未平之時該本所班軍連名具本奏乞掣回情願入山殺賊未蒙准行查得該所之設原因地當要害移軍防守比之他處不同前項軍士合無掣回本地却於魯班壑花園口尖綻口三處各設城堡一座每堡撥千百戶各一員管領前項軍士一百三十名分爲兩班按季或逐月更番戍守專一巡邏遇有山賊竊

發卽便擒捕仍聽守巡官嚴加約束稽考其修築城堡錢糧不須別爲措處查得臣所請賑濟銀一萬五千兩除支取賑給外尚多餘銀聽巡撫官調度支用但築鑿城壕起蓋房舍亦須規制宏壯萬一本地或鄰境有事可以屯軍容衆如此則河北之關門慎固山西之盜不得窺中州矣

一收降脅虜之人臣初建議亦曰若山險可關道路可通莫若令其依山便業居住照舊納糧當差庶幾易於安定今查得副使牛鸞僉事陳大

綱楊朝鳳巡撫都御史王應鵬各招男婦共三千餘名口河南副使翟瓚僉事溫濡祁鶴叅政陶諧各招收共一千四百餘名口俱於臣未至之先安插山中已定臣於彰德府審得見監脅虜平民一百九十一名口又於潞州審得生擒賊衆亦係脅誘四十五名及妄攀平民因賊情註誤親屬無辜淹禁者四十餘名口俱從釋放寧家前此州縣給以糧米近日又蒙朝廷發銀賑濟今羣情始定頗有樂生之心矣惟在設立縣治之後縣官加意撫卹暫免徭役數年庶幾

漸有生意但經罹兵燹生計蕩然旦夕無以爲命此縣治之設所以急宜舉行一以乘衆心懲剝之機而得以收其渙散一以假經營僱募之利而得以濟其窘困至於分里編甲造入版圖又在設官到來次第施行前項人民止應如此安插蓋懷土之心勢難強拂况數千之衆雖欲編置他處田地廬舍措處皆難况三王不易民而治天下無不可化之人此前日欲其解散出山之說所以難行而撫處之宜所以失之也伏惟聖明照察

一山中田地多是旁山高下開墾苦無平疇廣隰山場雖廣惟生橡栗荒年可以療饑別無出產居民甚貧尚賴牧放牛羊頗擅其利臣先建議以爲倘可設千戶所卽以山間土地撥軍屯種而以原所屯田抵兌給授收降之人或設巡檢司卽以山間田地召募有力無田之人僉克弓兵二項區處今不可行蓋收降之人旣已各歸本土則山間田地自各照主管業更無空閒但首惡陳卿之家與經兵殺絕人戶所遺地土恐亦不多合當入官俟設縣之後聽巡撫或該道

兵備官委官編里定甲之時一體清查仍要定以輕則從寬起科或召便業人佃種或給與填實人戶佃種此有司之事可以從宜區處也

一開設縣治起蓋衙宇公館學校舖舍城池壇廟街道及設玉斗崖蟠溪峰白雲谷巡檢司三處

玉峽虹梯關門二座開修道路八條共計一百七十里一應木石輓斃夫匠工費大約會計擬料合用銀不下萬兩今該州比之偏小地方雖頗號爲富庶然近日用兵科索繁重民已不堪昨者伏蒙恩命發銀一萬五千兩令臣量行賑

給止是被賊殘害貧民與脅虜人口除支過銀四千兩零五錢賑濟已完臣已動支一百二十兩起蓋關門尙餘剩銀一萬八百七十九兩五錢在庫合無動支前銀以爲設縣之費萬一不敷聽巡撫官於大小衙門贓罰紙價銀內取用查得本州匿稅商銀尙以數千計少加追徵無不足用俱可不動民力秋毫而衆役舉矣

一議設新縣宜作裁減衙門其知縣必得本處旁近州縣官歷任年深練達民情事體者改用除另行具題外典史及儒學教官巡檢等官亦乞

勅吏部掄選年貌少壯才幹敏達者以充庶克
 有濟仍伏望聖慈錫以嘉名以昭萬世謹將青
 羊山地形堪設縣治巡司關隘處所畫圖貼說
 具奏進呈仰塵聖覽臣不勝冒昧隕越之至
 嘉靖八年正月二十八日題二月十二日奉聖旨該
 部知道欽此

為處置地方以圖久安疏

臣節該欽奉勅諭親歷青羊山地方會同巡撫督同三
 司等官勘議應否設置衙門開修道路欽此欽遵除會
 行巡撫督同三司等官議處各項建置區畫緣由臣已
 經具題外今將山西潞城縣青羊山地形堪設縣治巡
 司關隘及河南林縣堪設軍堡處所畫圖貼說具本奏
 進仰塵聖覽臣不勝隕越之至
 計進畫圖貼說一本嘉靖八年正月二十八日奏二
 月十二日奉旨圖本留覽該部知道欽此

薦用人才以保安地方疏

臣奉命處置潞州地方事情除欽遵外臣看得本州山
 險地大欲要添設兵備改爲府治青羊村僻在深山隔
 絕官府以致民易爲盜欲要開立縣治其建置區畫緣
 由已經開坐具題倘蒙聖慈俯賜俞允則創始之際尤
 貴擇人臣偶有聞見不敢默默訪得順德府知府陳伯
 安抱負經濟坎坷仕途起擢曹郎而賢聲懋著歷守名
 郡而德澤旁流誠得斯人以爲兵備則惠政足以牧養
 細氓風力足以彈壓姦宄必能整修武備輯和民人而
 百度舉矣又看得潞州知州周吳器局量平操守廉介

剽繁治劇而綽有餘才應變識體而素懷遠畧必得斯人付以新縣則精勤幹濟可以勝開創之勞歷練老成可以任教養之責必能勇建新功坐弭積患而一方安矣臣才非達識輒干用舍之機顧事在得人過有成敗之慮若伯安則臣素知其賢若吳則臣親見其能者也如蒙采聽乞勅吏部再加咨訪果以臣言非謬乞將陳伯安陞按察司副使領勅整飭潞州兵備周吳量陞府同知職事管理新設縣事仍乞特賜綸音勉二臣以三年之後開創功畢政化有成卽宜不次陞擢以旌其勤如此則人才思奮而事業必有可觀地方底寧而生靈

蒙無窮之福矣

嘉靖八年正月二十八日題二月十二日奉聖旨吏部知道

懇祈天恩申明屢降勅旨撫諭兵後殘民以安地

方疏

臣准兵部職方清吏司手本案呈奉本部送兵科抄出
山東提刑按察司整飭青州兵備副使牛鸞奏為親老
身孤懇乞天恩以圖終養事內開先為親老身孤五乞
天恩以圖終養事奉聖旨牛鸞已有旨操練民兵聽山
西調用不准終養欽此欽遵外臣於本年九月內復奉
陛下明旨蒙兵部移文調遣山西殺賊臣遂於本年十
月初五日進兵當日辰時遇賊交戰初六日又戰初八
日又戰所幸四日三捷賊徒敗散擒斬受降之餘所遺

無幾臣隨具本令兵部原差千戶樊欽青州左衛百戶楊鼎於初九日奏報外是日晚復差前鋒指揮查瑤督率千戶劉岱市民曹浩等襲取賊巢遂獲賊首陳卿父母妻子弟妹一家人口老幼無遺尙餘賊卿兄弟三人未獲臣復遣人四散搜捕賊卿窘迫投赴山西陳僉事營訖臣復具本令百戶寇岱奏報彼時臣差人哨探得河南人馬於初八日未時到智度寺劉營總兵魯綱及山西曾指揮亦於初八日申時到彼劉營此時臣已經二三戰矣賊衆已鳥伏獸奔矣而各路之兵豈肯後期蓋緣河南之林縣山西之壺關縣去賊地方遠出一百

五六十里之外而臣駐劄潞城縣地方出門三十里之外步步是賊巢穴又臣之人馬以初五日出各路人馬以初六日出地里遠近旣殊日期先後又異所以賊卿不得不來迎敵臣不得不與之鏖戰故也臣仰荷陛下威靈廟廊成筭不意三五日之間倖作倖成賊徒捕滅臣於十一日收兵十三日侵晨差人具奏遂班師臣在故鄉見邸報差夏給事中查勘潞城事情臣無任慶幸蓋我陛下天地之仁不但遠被寒谷而日月之明又有以下及覆盆矣容有一夫之不獲哉何也卿賊小醜本不足平而孟浪虛喝人心動搖所以河南山西待之太

深聚兵萬衆屯守年餘彼無知小民遂謂真不能下以致我皇上赫然震怒爰整師旅彼時止是北面一軍而賊卿徒衆已如燈滅火消無復餘燼所以南面大勢人馬接戰未及不免放兵搜捕其焚燒擒斬之中賊之徒類多而脅從避兵之人恐亦未免但使一夫受枉寧不傷我陛下之仁哉臣慮勘官到彼捕盜細人譸張虛誕張大功能不思人命可憐惟欲貪慕功賞雖勘官聰察何所憑據臣彼時襲取賊巢之時搜獲賊卿戰策文簿一扇大小點名簿三扇其中惟有名劇賊統領徒衆者不列於內其餘黨與巢穴徒類姓名無不開載一披閱

間真僞自明除抄謄一部臣自備照仍將原本呈送兵部立案外今復照原本備細抄謄本後以便我皇上觀覽乞勅兵部再將原本抄行勘官會同彼處巡按調取河南山西俘囚一一查審如是簿內有名真賊重處無疑其簿內無名者提取里老親隣再加研審果係真賊仍加重典若是脅從避兵之人卽與分豁其焚燒室廬果係賊巢去處盜賊產業不難議處若是脅從之家及不係賊巢去處或量爲優卹或量賞價值如此則死者雖不及救而生者尙得分理焚者雖不可復而貧者尙得苟活則人心可安民患可息矣不然臣慮地方殘破

之餘新撫遺民棲止無所加以小民困頓之情枉抑莫伸之氣而他日之事尚有所不可言者矣臣乞歸之人何暇及此但嘗從事戎末聞見頗真又有搜獲簿籍豈敢自隱以負我皇上受知委任之恩哉等因具本奏奉聖旨牛鸞節年擒斬盜賊多效勞績不准放歸著照舊用心供職所奏事情兵部便行與差去給事中查照施行欽此欽遵備行到臣已經會同山西巡按王朝用案行山西布按二司守巡冀南道叅政等官邵錫等查勘去後今據山西按察司分巡冀南道僉事賈啓呈行據潞州申繳查得前項簿內與見獲人犯姓名大畧相同

節蒙審據賊首陳卿執稱原係黎城縣知縣楊良臣招撫之時編爲保甲及蒙欽差兵科夏都給事中隔別調審餘賊訐其夥伴往往與簿符合揆厥所由蓋始於楊良臣招撫編爲保甲輯爲草劄賊卿因而膽之竊爲戰冊遂盡脅其人以爲黨與及照賊犯數多情狀不一或習性兇頑出於風氣或漸染汙俗陷於無知或亡命惡少聲勢相依或脅逼昏愚情非得已加以巢穴險崎官府寫遠遂致鼠狗猖獗豺虎縱橫及我師一臨勢如瓦解櫻鋒者授首抵敵者成擒而偷生餘孽烏散魚驚或倒戈投降或帖耳聽撫今幸渠魁斯得潢池載寧可矜者

既蒙生全未獲者又蒙招徠旋復舊巢各安故業戒諭之誠孚於心骨賑卹之典惠及妻孥當此畏威懷德之初豈無改過從良之念似亦寧靖不須安插已無嘯聚合免擒拏爲此除分別項數贍造原冊逐名註寫外申乞施行等因到道據此案照先抄蒙本科案驗該山東按察司兵備副使牛鸞奏前事備行各職查照副使牛鸞奏內搜獲青羊山賊陳卿點名文簿與今見獲賊人姓名一一查對有無相同其簿內有名未經擒獲者若干卽今有無下落抑俱是良民爲其冒造名字必欲汗染逐名查究的確仍查前項文簿是否陳卿編造抑別

有緣故若果係賊名文簿要見已擒獲未擒獲見在監故已投首未投首各若干卽今應否安插應否擒拏逐項分別明白具由造冊繳報以憑奏處施行等因蒙此已經行仰本州查勘去後今據申繳前來爲照前項賊犯既平之後非不欲查將真賊從重處置以絕禍根然獸獮草雉既非仁者之心而棄物絕人亦非明時之政牛副使之冊又不早出示人則其所奏已無及矣卽日本科會同撫按賑卹教示各項施行無復餘法爲此今將前項緣由理合呈乞施行等因到臣叅看得副使牛鸞所奏搜獲陳卿戰冊及點名文簿先經臣面審陳卿

執稱原係知縣楊良臣就山招撫編定保甲文簿並無
戰冊點名字樣後因賑濟覆審被脅山民近將新近投
首餘黨反覆研究始得情實前項簿籍委係陳卿等因
見大兵四集將山中附近居民盡數籍記編爲總小甲
花名無非欲厚集黨與負險拒敵彼時山中人民畏懼
官兵卒至人人自危各保旦夕其勢不得不相結聚其
計不得不爲抵敵出於勢迫要非得已所據簿載一千
二百餘人委係臨時糾合原非平日真盜中間各村老
幼愚蒙有籍其名而其人竟不知者且各路官兵擒斬
收降數內查得簿內有名者止四百九名則八百餘名

皆屬見在山民未經擒獲若據有名者皆賊則前日三
省兩鎮一萬七千官兵竟不能盡擒而收降二千餘名
又非簿內有名人數何其賊之多耶此簿之所以不足
據也臣查得原日生擒監候者二百八十餘名名今監故
者近二百名迭臣會審者八十餘名審係情真陳卿等
三十餘名仍解送山西按察司監候奏請審係脅從良
民四十餘名卽將釋放已訖又查得原日招降者三千
三百餘名口臣未至之先已經都御史王應鵬委官安
插已定卽今無從查審况簿內有名者未必皆賊若以
此爲據不免重有冤枉且足以搖動衆心大非計之得

者以臣之愚當時搜獲此簿祇當卽軍中焚之以安反側斯爲長慮卽如鸞所言亦宜於收兵入城之後卽當以此簿付山西巡撫官會同諸領兵官將陳卿審實却拘一時見在擒獲收降人犯按此鞠問以別真僞卽時施行爲是緣何彼時隱匿不發却私自收藏回家直至聞朝廷差官查勘方將此簿奏聞用情詭秘殊不可曉除經備行查明而該道及該州申呈之詞俱爲有見惟是平日爲陳卿脅誘委會助惡拒敵官軍亦係簿中有名而近經大兵所未擒者一向潛遁山谷不曾投首尙懷野心加以山民經兵焚蕩太慘旦夕無以爲命竊可

軫憂近日新調知州周昊老成練達深識事機到任以來加意撫處極力招諭續收到前項自來不曾投首被脅餘黨李錦等四十餘名到官及臣抵潞州出給告示多方曉諭之後又投首到陳倫等二十一名前後六十餘名臣謹遵照節奉明旨准其投首仍面加訓諭宣示朝廷德威皇上仁聖俱各舉手加額感激流涕誓死不敵爲惡頗有革心向化之誠自此六十餘人投首之後山中人心始安臣竊恐山民聞鸞復有此奏未免驚駭地方將來之患不可不虞伏望陛下天度兼容大施恩宥所據牛鸞原奏簿籍乞勅兵部焚毀以釋羣小之疑

仍乞特降玉音除首惡陳卿等情真強賊王英王仲興等三十餘名不赦外其餘安插已定與近日投首到官李錦等并一應簿中有名無名已首未首之人一體通行赦宥申明屢降勅旨騰寫黃榜入山張掛曉諭使山間幸免鋒鏑苟全性命殘民皆仰知陛下如天好生之德泣辜解網之仁憂勞惻怛終始哀矜廣大無窮之意庶使人心大定地方底寧陛下聖德真可格於皇天而山川草木無不幸甚矣

嘉靖八年

月

日題二月

日奉聖旨兵

部看了來說欽此

桂洲奏議第四卷

金

諫垣集卷之四目錄

奉勅查勘青羊山平賊功次以明賞罰疏

桂洲夏文愍公奏議第四卷

金

門人

涇縣左

鑑

編輯

宣城貢汝成

校正

華亭徐

階

武進薛應旂

裔孫

之瑞

重訂其

全校字

之琳

澍

諫垣集卷之四

兵科題

奉勅查勘青羊山平賊功次以明賞罰疏

臣欽奉勅兵科都給事中夏言節該巡撫都御史等官
潘墳等奏稱山西潞城縣青羊山賊情已寧各來奏捷
續該爾奏稱都御史常道始則輕謀妄動輒興兵端既

而好事徼功驅民爲盜都督魯綱久奉朝命遷延在途未嘗與賊交鋒妄稱對敵斬獲等情皆有罪可論所宜黜罰及稱近日進兵機宜平盜方畧盡出都御史潘墳經畫并副使等官翟瓚牛鸞楊朝鳳陳大綱等皆有功可錄所宜旌賞及要處置青羊山後來事情乞遣差風力給事中前去勘處朕惟賞功罰罪必合公論思患預防必須慎處朕以爾之奏况爾風力可稱特就勅爾前去彼處地方會同各該巡撫巡按查勘青羊山前項叛賊起自何年是何官員失於撫捕何官激迫爲亂近日斬獲招降果係何人計處方畧各該主客官軍孰爲有

功孰爲有罪分別輕重等第照例造冊奏繳以憑陞賞黜罰如常道果有逼民爲亂妄動生事魯綱果有遷延不進妄殺報功等項情罪務要從實叅究不許推避容隱就親歷青羊山地方會同巡撫督同三司等官勘議應否設置衙門開修道路收降之人應否編甲安插山間田地應否起科開屯原奏內一切事情俱要區畫停當期於經久可行被賊殘害地方賑濟存卹等項亦就會同從宜區處應奏請者具奏定奪應該拘取聽審人員若地方寫遠聽爾於附近適中去處約會審查爾受茲委任必須盡心竭力熟思審處務使功罪得實賞罰

有據處置得宜保無後艱斯爾之能爾勿畏憚當求至
 公稱朕委命如或苟且塞責罪亦難逭爾其慎之慎之
 故勅欽此欽遵先該准通政使司經歷司手本為地方
 賊情乞發天兵以速平蕩事准職方清吏司手本奉本
 部連送該本部題本司案呈奉本部送兵科抄出提督
 山西河南兼鎮守河間等處總兵官左軍都督府都督
 同知魯綱題奉聖旨兵部看了來說欽此又該提督鴈
 門等關兼巡撫山西右僉都御史常道題為擒斬強賊
 先挫鋒銳事又題為官兵深入賊巢招降千餘名口事
 又該巡撫河南右副都御史潘墳題為地方賊情乞發

天兵以速平蕩事又題為飛報捷音事又該山東按察
 司整飭青州兵備副使牛鸞奏為捷音事又該都御史
 常道題為擒斬招降強賊事又該山西巡按監察御史
 穆相題為招降賊衆事又該山西巡撫右僉都御史王
 應鵬題為捷音事又該都御史潘墳題為征剿逆賊功
 完報捷事奉聖旨兵部看了來說欽此又該都御史潘
 墳題稱行據軍前紀功僉事祁鶴呈將查過招降并擒
 斬男婦開坐奉聖旨兵部知道欽此又該兵科都給事
 中夏言等題為查勘平賊功次處置地方以明賞罰以
 圖久安事奉聖旨你每說的是這起山賊本因官司所

激今常道魯綱却乃冒功飾過就着夏言前去查勘明白分別功罪奏請定奪不許避難寫勅與他該部知道欽此欽遵通抄到司查得先爲飛報賊情事該本部題奉聖旨這賊情待各官奏報至日你部裏一併看了來說原擬陞賞條格便查照舉行欽此及查得先爲大勢強賊舉火劫財殺死人命等事該山西鎮巡等官都御史常道等題稱潞城縣青羊地方強賊陳卿父子兄弟稔惡劫殺乞要查議撫勦該本部覆題奉聖旨這起強賊糾衆劫殺貽患地方本當痛加誅勦但恐中間脅從者多情罪不同着山西河南各巡撫會同各鎮巡官嚴

督守巡等官從宜起調附近衛所州縣官軍兵夫委的當官管領約會夾攻務將有名賊首陳卿等多方設法緝捕得獲明正國法其餘脅誘逼虜的果能聽令解散及擒斬賊夥送官應撫應賞鎮巡官議奏處置如或執迷稔惡結聚不散即便分布官軍防守相機剿殺務要殄滅以靖地方勿得玩寇殃民自取重責欽此又爲強賊勢衆拒敵殺人添調慣戰官軍剿除事該都御史常道等題稱要調三關精銳馬步官軍各五百員名前去追殺等因本部題奉聖旨是這強賊據險爲患已久各該地方官軍不早設法擒捕以致聚集徒衆敵殺官兵

大肆猖獗本都當究問但在用人之際姑從寬該道守
巡及該府衛州縣掌印巡捕等官都着住俸戴罪殺賊
鎮巡官便調取三關精銳馬步官軍選委謀勇都指揮
等官前去會合該地方官軍民兵相機誅剿務期盡絕
仍出給告示曉諭脅從之人有能自首解散者悉免本
罪獲功賞格依擬行還行隣境官司嚴加防守把截勿
令奔逸貽患若各分彼此致誤事機一體重治不饒欽
此又爲請處賊情以圖早安地方事該山西巡按穆相
王獻題稱都御史常道意雖除患跡涉輕妄都御史常
道題稱姦黠之賊全恃山險乞要副總兵趙廉統領三

關官軍兼令節制河南本部議擬覆題奉聖旨這起強
賊倚恃山險敵殺官軍數多又執留職官情罪深重前
已有旨調取三關兵馬會合各地方官軍民兵剿殺如
何致令猖獗本都當提問但緊急用人之際且都記着
你部裏便行與趙廉着將三關事務交與邵定帶管量
選精銳馬步官軍一千員名前去附近地方駐劄募選
慣能出入山險鄉導槍勇打手四五百名其河南守巡
領兵等官悉聽節制相機進剿以靖地方朕又念爲惡
賊首不過陳卿父子十數人多有良善之家被其脅從
若一槩剿滅誠所不忍你部裏還宜宣布朝廷德威刊

刷黃榜分布張掛曉諭凡被脅之人聽投首解散不許
官軍擅行殺戮報功有司仍給與執照安插其諸色人
等有能擒斬陳卿父子及有名賊首的賞銀三百兩軍
職陞三級世襲軍陞實授百戶民授土巡檢職事仍將
犯人財產給賞如陳卿父子兄弟及同黨之人自相擒
獻者悉免本罪仍照數給賞有能倡率深入賊巢招撫
餘類及自能招撫的都照你部裏議定賞格行仍依擬
選差里老并見拘陳卿家屬着齋執榜文諭令陳卿等
果能束手聽服先將執去職官王朝雍等送出許赴軍
門自訴日前誣招裝陷致變情由奏聞朝廷處治若仍

前負固不悛各該地方官軍即便督率進剿其隣近地
方俱要嚴加防守把截勿致奔逸貽害地方前項失事
官員務要同心協力以功贖罪事寧之日撫按官通查
功罪奏請定奪欽此又爲陳言急救荼毒德化強賊免
調官軍以蘇民困以安地方事准吏部咨該聽選監生
李克紀奏該吏部尙書桂萼看得李克紀奏稱生長近
山稔知其事欲乞深入諭以朝廷之威導以自新之路
首惡可以不久就擒脅從可以不攻而破自願單騎往
彼以身率先亦其志也咨部覆題奉聖旨是這監生便
照例應付送去巡撫處贊畫聽用果能設法計擒前賊

本
沙
奏
言
忠
禮
書
院
安靖地方准令該選職事上加陞三級仍照原擬給賞以酬其勞欽此又爲不職撫臣用兵失律以貽害地方事該兵科給事中商大節題本部覆題奉聖旨是常道且不究着用心調度殺賊以贖前過仍照前旨待事寧過查功罪輕重上請定奪欽此又爲送回知州官員等事該山西巡按穆相題本部覆題奉聖旨是腹裏愚民恃險爲亂比之夷狄不同赤子盜弄兵革恐亦有因撫剿二端正宜並行不悖常道穆相所奏皆不爲無見正宜相濟爲用觀其奏詞似多相訐且都不究卿等議處深合事宜便行與各官查照依擬處置應撫應剿徑自

從宜施行務在同心協力以安地方不許偏執已見沮撓誤事仍行山東巡撫着副使牛鸞挑選慣戰鎗手操練聽候若前賊執迷不悛卽調牛鸞領兵前來痛加誅剿楊良臣改太原府通判添註管事仍留軍前聽用待事寧之日并王朝雍等有功有罪人員一併查議定奪欽此又爲請處賊情以圖早安地方事該都御史常道題本部覆題奉聖旨是這賊情已屢有旨了你部裏便行與撫按官督同兩省官軍相機撫剿務在同心協謀以靖地方仍着查訪前項各賊出劫地方失事人員奏來處治欽此又爲撫安賊盜寧靖地方以安人心以全

民命以免天兵剿捕事該都御史常道等題要推舉本
臣提督本部題奉聖旨這地方賊情已屢有旨着相機
捕剿鎮巡三司等官彼此牴牾調弄繁文全無計處方
畧豈不養寇貽患常道巡撫山西若只令防禦北虜腹
裏地方失事彼將得以辭責巡按職在糾察亦難令其
專理潞城等處賊情還行與各官遵照前旨及你部裏
節次計處事宜再行差人入山曉諭陳卿等禍福利害
如果畏罪悔過將先日敵殺官軍賊首計擒送官卽免
其罪果有誣枉聽其具訴伸理倘若執迷不悛陽順陰
逆卽便調集主客官兵相機剿捕不許隱情姑息巡撫

合行之事巡按勿得立異阻撓若常道不堪委託你部
裏指實叅來別差大臣前去整理欽此又爲陳言急救
荼毒德化強賊調免官軍以蘇民困以安地方事該贊
畫監生李克紀奏乞要將撫過人口量給官粟蠲其賦
稅本部議行鎮巡官查議具奏定奪去後又爲亟剿逆
賊以靖地方以杜後患事該兵科給事中孫應奎題稱
山賊陳卿爲惡不悛乞調相應人馬責付謀勇將官因
時制宜剿捕本部覆題奉聖旨是着魯綱量選所部各
地方慣經殺賊官軍并原帶京營軍馬前去衛輝彰德
附近地方駐劄山西河南二省守巡兵備守備等官各

統所部官軍民兵俱聽魯綱節制調遣如果各賊執迷不悛虛文聽撫不會束身歸罪即便督軍相機進剿常道也就移在潞城臨近去處與魯綱相爲犄角共圖成功若各賊輸情悔罪將先次敵殺官兵首惡人犯綁獲送官明正典刑仍照前旨撫處具由回報欽此又爲地方賊情乞發天兵以速平蕩事該山西巡按蔣賜題前事覆題奉聖旨是這山賊恃險爲亂屢有明旨招諭未見悔罪懾服顯是假以聽撫緩我兵機會兵征剿勢不得已潘墳着在彰德衛輝等處駐劄常道照前旨移近潞城地方各調該管官軍民兵督委二司官員陳大綱

翟瓚等與總兵魯綱所統官軍協力會謀待天氣稍涼相機合兵進剿副使牛鸞所統馬步軍兵亦照原擬調來聽撫巡官調遣委用若兵馬未進之先各賊果能束身投首將敵殺官兵兇犯擒拏送官明正典刑仍照前旨撫處欽此又爲剿叛賊以靖地方事該巡按直隸御史段汝礪題稱潞城山賊負固旣久地連三省兵兼四出事權不一添設總制本部覆題奉欽依通行訖又爲地方賊情乞發天兵以速平蕩事該總兵官魯綱題本部議擬覆題奉聖旨這山賊恃險構亂擾害地方本因撫按官不和不能早擒致被屢諭不悛復又糾集衆多

事亦有由常道撫剿久無成功吏兵二部即日會推相應官員星馳前去交代畢日着回京該州知州另擇才能濟事的調用調兵并賞賜事宜都依擬行各該官員務要協力同心設法撫剿相機行事不許仍前彼此相抗以致誤事欽此又爲昧死陳言以獻餘忠事該兵部尙書李承勛奏稱山西潞城之賊數百人耳倚山負固類穴中之鼠計處則易仰攻則難宜行鎮巡各官彼此協和先爲可勝之計及兵科給事中周祚題該本部覆題奉聖旨已有旨了欽此又該少師華蓋殿大學士楊一清張璠翟鑾會題稱賊首陳卿父子兄弟據險稱兵

張打旗號編勒部伍流劫鄉村殺人放火掠虜財物甚至剝剔嬰孺屠戮商旅嘯聚將及數年皇上仁同天地節因守臣之奏以赤子無知盜弄兵革情有可原雖用兵防禦每令撫剿兼行各賊不知悔過自投乃敢拒敵我師傷我指揮等官三十四員殺死軍民人等不下千百罪惡至此已不可赦而聖心愴然猶欲開其自新之路揭是黃榜遣人招諭聽其解散下山許以不死而執迷不悛既不將脅從之人遣發下山亦不肯將先次敵殺官軍首惡兇犯綁獲送官陽順陰逆以緩我兵比者都御史常道屢言之而沮不得行後御史蔣暘又極言

之兵部覆奏荷蒙采納命魯綱會同兩省巡撫議處進
兵衆心稍快等因奉聖旨朕覽卿等所奏已別有旨了
該部知道欽此又該少傅謹身殿大學士張璠題稱昨
承聖諭欲掣回潞城討賊之兵更易巡撫官着用心設
法撫剿或待其自定夫更易巡撫官設法撫剿仰見聖
謨之所在矣如掣回兵馬或待其自定非愚慮所能及
者夫自古帝王未有不誅天下之亂者也孟子稱文王
一怒而安天下之民武王亦一怒而安天下之民皇上
一怒而安天之民■以大振中興之業此其機也昔唐
吳元濟反於淮西憲宗命諸將討之元濟求救於逆黨

王承宗李師道二人數表請赦元濟不從已而王師無
功乃遣中丞裴度詣行營宣諭度還言淮西必可取制
誥韓愈言淮西三小州殘弊困劇之餘而當天下之全
力其破敗可立而待然所謂可知者在陛下斷與不斷
爾已而淮西果平臣切惟唐之有吳元濟不啻今日之
有陳卿也裴度謂淮西腹心之疾不可不除猶今日潞
城爲京輔近地不可容亂賊所據也彼謂師老財竭欲
請罷兵猶今日有欲罷兵之言者也倘蒙聖斷駐兵征
剿平此一方則威行於沿邊風聞於天下潞城則中國
之寇魁首尚在敵殺官軍凡三十四員屠戮生靈無筭

誠不可不誅等因奏奉聖旨朕覽卿奏已別有旨了該部知道欽此又爲訪報賊情事該本部題據原差千戶薛永稟稱青羊山賊徒聞兵往征結聚肆行搶掠於本年八月初八等日大搶林縣潞城黎城壺關等縣地名任村等處村店等情爲照都御史常道奉旨致事卽今正係地方有事之時合無馬上差人催新調都御史王應鵬作急前去山西會同河南都御史潘垣總兵官魯綱副使牛鸞遵照本部節次題奉欽依內事理查照舉行如果前項失事干礙守巡等官李際可陳大綱指名叅奏等因題奉聖旨是山西賊情緊急便馬上差人齎

文與王應鵬不必等候交代星馳前去潞城附近地方駐劄會合魯綱牛鸞等嚴督調到官軍協力夾攻相機剿殺務早成功以靖地方失事人員指實具奏區處欽此俱經通行欽遵外今該前因通查案呈到部看得都御史常道題奉副使牛鸞十月初五日進兵指揮查瑤千戶劉岱魏堂百戶楊鼎寇岱督率總甲陳秩小甲王廸曾艾等三十人與賊對敵前後夾攻斬獲三顆殺死七名割取耳記七副生擒普連等四名今山東官兵當諸兵未集之先卽能擒斬一十四顆賊衆驚潰將來諸兵皆集卽可成功又題稱魯綱初八日至智度寺會遇

河南兵賊遯東北山訖遺下巢穴已自燒燬牛鸞初入
日又戰五井地方斬首二級生擒一名降者千餘名陳
卿三弟兄之馬已得十一日僉事陳大綱領兵到谷堆
底斬首二顆生擒五名投降二十餘名收獲牛羊近千
及都御史潘墳咨內開稱初六日叅政陶諧報稱指揮
吳捷土人儀賓郝世昌斬獲守隘劇賊殷得山等四名
生擒二名招降男婦僧人一百一十略副使翟瓚進兵
擒獲姦細一名陸續擒斬逆賊宋子朝等二十五名投
降男婦三百五十八略又指揮吳捷毛世威等入山奮
勇衝戰生擒賊首王章等及旗下收降一百餘名并燒

燬賊巢男婦六百餘略生擒七十六名斬獲首級五十
顆奪回馬羸頭畜共二千頭初十日僉事溫濡報據義
官史韜等官軍對敵斬獲耳記五副徐都司王守備次
日領兵到彼又將餘賊收降十一日守備王秉彜陣前
擒斬并收降男婦五十略陳相被我軍射死十一等日
陸續擒獲賊卿同居親叔陳良等九名及各賊家屬斬
獲首級耳記收降男婦六百餘名王章係主謀之人梁
欽係陳卿之舅俱已生擒賊之黨類所遺無幾及照河
南入山之路險遠而難山西出山之路平易而迄今河
南之兵奪其險據其腹從高而撲下自東而徂西先後

招降并擒斬賊犯男婦共一千七百餘名奪獲馬羸驢
牛羊旗鼓弓箭盛甲鎗刀等件都御史王應鵬題稱僉
事陳大綱初九初十日在谷堆底生擒有名賊一百餘
名招撫男婦六百餘名牛羊馬羸一千餘十一日陳卿
投降陳僉事營內并僉事楊朝鳳報十一日鄉夫王紀
引送招降一百四十名指揮曾宣部下生擒三十九名
斬首陳道倫牛子強等九顆賊老幼男婦一百二十名
并得馬羸牛羊數多又題稱僉事陳大綱督令鄉夫李
聚良等招降首惡陳訪斬獲陳相首級生擒石虎等一
十三名又招降賊首陳奉等八百及稱叅政李際可僉

事楊朝鳳署都指揮霍錦先因失事住俸殺賊今各官
於懲劄之餘及能感激思奮撫剿逆賊以收全功總兵
官魯綱題稱十月初六日進兵初八日至智度寺直抵
樂莊高嵩腦節遇大勢強賊會接副使翟瓚僉事陳大
綱官兵連日鏖戰初十日摘竒兵深搗柏木都碾鑽等
處督令追敗者生擒拒敵者斬首投來者招降沿山搜
匿盡絕查得陳卿等已被僉事陳大綱部下官兵擒獲
陳琦等被副使牛鸞部下官兵擒獲臣部下指揮鮑鼎
等官兵生擒強賊二十四名斬首二十四顆招降男婦
一百餘名旬日之內遂平數千之賊又稱都御史常道

木沙考言
調集官兵處給軍餉設策進山運謀擒寇都御史潘垣
設竒定策籌畫平寇新任都御史王應鵬接理運謀以
獲大捷俱綜督勞績相應獎勸副使牛鸞翟瓚僉事溫
濡署都指揮同知徐溥僉事陳大綱督率官兵深進賊
山親臨戰陣擒斬數多招降甚衆山西河南布按二司
叅政叅議等官李際可陶諧等部運糧儲隨給軍餉僉
事楊朝鳳祁鶴激揚士卒紀驗功次俱勞効昭著相應
甄拔其領兵指揮等官會宣吳捷等各任領軍之責俱
有率衆之勞分爲紀驗催運糧料等項委官知州同知
知縣縣丞典史等官黃梅張魏等均有勞蹟亦應賞犒

及有功官軍不避艱險乞要照例議擬陞賞賊首陳卿
并有名劇賊合無解京惟復監候典刑剝屍示衆副使
牛鸞奏稱初五日起兵辰時遇賊撫剿並用所幸四日
三捷就陣斬獲首級耳記一十二副生擒五名降服一
千餘名又奏稱戒諭軍士止許生擒剝銳不許斬首貪
功及密令劉岱陳秩等市民魯浩鎗手呂暹等直搗青
羊石返頭之巢遂獲賊卿馬匹連鞍及妻子路氏十名
查瑤等生擒陳琦石龍周子原等斬首王得實等四十
六名耳記二十四副及獲鎗刀響器盔甲等件賊首石
廷章被陳秩殺敗趕入石洞用火攻之查太等復拏陳

相陳奉各家屬張氏等十四名仍令韓英各路招撫牛
聚才等九百餘名巡按蔣暘題稱陳卿等稔惡累年流
毒二省仰承廟筭羣賊授首及稱都御史常道措處規
畫志期殄滅都御史潘墳指授方畧筭無遺策總兵官
魯綱副使牛鸞翟瓚僉事陳大綱等皆登高履險身先
士卒指揮會宣查瑤及有功軍士人等俱裹瘡血戰奮
勇奔敵乞要追查賞勞激勵人心各一節臣等嘗觀兵
威莫重於剿殺而後法令可行德政莫先於撫綏而後
惠澤遠布故虞舜必征苗乃格文王必伐崇乃降古今
一道而已叅照山賊陳卿本以脫逃罪囚倚居山險乃

敢不畏國法蹈積祖之爲非踵父兄之不軌招集流移
亡命爲彼烏合爪牙劫財殺人敵殺官兵貽患諸省先
該守臣奏要誅剿本部查議覆題仰惟皇上體念好生
之德不忍濫及無辜止罪陳卿父子有名數人其餘脅
從聽其解散夫何此賊不知悔悟又監生李克紀與通
判楊良臣節次撫諭而自懷疑懼是以內閣元臣及科
道等官屢言征討而調集兵糧今提督鎮巡等官乃能
督勵將士四面合攻旬日之間賊首遂爾就戮餘黨果
已招降渠魁陳卿勢窮奔竄無及亦已就擒巢穴蕩平
地方寧靖上黨閭閻之老穉胥慶獲安鄰藩上下之供

需威期休息野火一時絕焰山靈千里無虞實由我皇
上至仁大德神武不殺之威廟堂元老協謀贊襄官兵
用命肆集之所致也平盜偉績真爲可錄驛道喧傳人
心稱快爲照上天生物之道在陰與陽聖人致治之規
在刑與賞所以然者陽以生物陰以肅物而後歲功成
刑以除患賞以報功而後王化行自古帝王致治率不
外此提督總兵官魯綱綜理戎務分布得宜河南都御
史潘塤設策運謀竭力成功今致仕都御史常道身方
離任心已久勞新陞山西都御史王應鵬先期發兵兼
程趨事巡按穆相蔣暘振肅風聲陳奏經畧功俱可嘉

副使牛鸞翟瓚僉事陳大綱身親冒險直搗賊巢收獲
元惡招降賊衆功尤可尚叅政李際可陶諧僉事楊朝
鳳溫濡祁鶴都指揮霍錦徐溥或督理兵糧或催嚴行
陣隨事効勞功皆難泯伏望聖明軫念各官平茲積年
巨寇安彼兩省生靈斷自宸衷先行溥加恩典以酬勞
勩其副使牛鸞撫過一千九百餘名擒獲賊首陳琦石
虎等翟瓚撫過六百餘名擒獲賊首王章陳良等僉事
陳大綱收獲元惡陳卿陳奉斬首陳相撫過六百餘名
各與本部原擬招撫餘類五百名以上陞實授二級事
例相同守備郭舉王秉燹指揮查瑤吳捷等十五人知

桂洲奏言
縣于慧等五人千戶劉岱等七人百戶楊鼎寇岱所鎮
撫魏堂土人儀賓郝世昌義官王自強孟雄鎗手王廸
等五人快手李光澤市民魯浩鄉夫王紀等九人及總
兵官魯綱奏內二省布政掌印及軍前紀驗功次催運
糧料等項官員行移各該巡撫官動支官庫無礙銀兩
買辦花紅羊酒分別等第徑自從宜犒賞內二司該道
守巡及該府衛州縣掌印巡捕等官凡先會失事住俸
人員俱宜開支聽候再照各該提督等官差來奏事百
戶等官楊挺等四人驛丞等官楊紹華等六人各承奏
報捷音固雖常職而道路奔馳均有微勞楊鼎等四員

似宜照例陞賞楊紹華等六員亦合量賞以勵人心通
前大小恩典俱各出自朝廷臣等不敢專擅更乞聖裁
臣等又查據各官先後奏報文移檢閱捷音數目不惟
彼此異同抑且互相滯礙兼以日期進止亦似不倫詳
其撫多於剿則論撫卽其剿重於撫則論剿况事干三
省兵兼四出中間或有隱伏情節及先會失事人員邀
冒詐飾之弊并卽今被獲人犯牽連掛誣之人難保必
無又近該兵科都給事中夏言等具奏前因必須通勘
方服人心合候命下行令都給事中夏言作急領勅兼
程前去山西河南適中地方會同各該撫按等官先將

三省一切有功人員上緊逐一覈實要見某日某官何處進兵首判賊鋒某日某官何處繼至進搗巢穴某官的係總領某人亦係分哨就將各部下官軍斬獲首級生擒招撫等項數目功次分別明白首功大陞有功應贖餘功加陞并該賞該罰一併查勘的確逐一開款造冊奏繳一面將首惡陳卿陳琦父子并各起擒獲賊犯情重情輕通行鞫問明白照依律例議擬有名渠魁牢固監候轉詳法司奏請明正典刑以彰法令再將招降人口并見獲賊犯家屬財產等項各令處置相應及監生李克紀原擬設縣立學并先與通判楊良臣招撫功

績應否量沾恩賚與凡兵後地方應處未盡事宜一一從長參酌會議停當作速會奏以憑上請施行再照魯綱係欽命提督官常道係舊巡撫官臣等亦照往年事例各官成此功能通併開列但見該都給事中夏言論劾奉旨查勘之日再行議處合無仍候勘明惟復別賜定奪及節奉欽依兵部看了來說兵部知道你每說的是這起山賊本因官司所激今常道魯綱却乃冒功飾過就着夏言前去查勘明白分別功罪奏請定奪不許避難寫勅與他該部知道并先奉欽依這賊情待各官奏報至日你部裏一併看了來說原擬陞賞條格便查

照舉行事理未敢擅便等因嘉靖七年閏十月十一日
本部尚書王時中等具題本月十六日奉聖旨這事還
待差去官員行勘明白具奏議處定奪欽此欽遵擬合
通行爲此除外合連送該司仰行通政使司經歷司呈
堂轉行兵科都給事中夏言查照本部題奉欽依內事
理欽遵施行等因連送到司擬合就行爲此合用手本
前去通政使司經歷司呈堂轉行兵科都給事中夏言
查照施行准此除呈堂外擬合就行爲此合用手本前
去兵科都給事中夏言查照施行等因備行到臣除會
同山西巡撫王應鵬河南巡撫潘墳山西巡按王朝用

河南巡按譚纘會案行委山西左叅政邵錫僉事賈啓
河南右叅政伍全僉事張庠照依案驗節次備奉欽依
并勅諭內事理各會同備查青羊山叛賊起於何年月
日據險集衆爲亂先於何處府州縣地方強劫某人家
財殺傷某人姓名會否取具真實贓仗供招立案會否
攻圍城池劫奪庫獄謀爲叛逆是否陳卿一人倡亂抑
別有首惡人衆及因何處拏獲事發係何地方官員不
行卽時追捕後據何人供報何官呈稟奉何衙門明文
輒動官軍以致拒敵殺傷釀成大患曾經幾次進勦不
利殺傷官軍若干員名復據何人設策又行招撫及會

經何人入山招撫不下方纔奏請調集京邊官軍因何
經年撫剿不効以致玩寇殃民及要拘審見今擒獲收
降人犯果盡係青羊山土著抑有四方流寓人民平賊
之後各該衙門會否委官審勘是否一一俱是陳卿夥
內強賊會否分豁脅從并不會爲盜良民收降人口卽
今安插何處有無官給衣糧見在死亡各若干名口見
獲賊犯家產財畜作何處置下落仍拘審見監賊首陳
卿等委於何時集衆行劫其真正賊黨姓名委有若干
當時實因何官失於撫捕驅迫爲亂務見兵興盜起根
因釀禍失事情節仍備查該省動調幾項官軍民兵若

千員名分布幾路地方進兵與各處官兵如何約會入
山之時的係某官乘險先登衝鋒破陣進兵收兵的確
日月地方并擒斬招降真實姓名各要開係某官部下
某人名下斬首若干生擒若干招降若干中間領兵人
員有無妄殺平民各該把隘人員有無縱賊奔遁其分
布機宜進勦期會指揮調度俱各稟受何官方畧及京
邊官軍并三省官兵中間有無逗遛觀望遠巡失期有
無妄殺投降冒報功次有無不會拒敵妄稱對陣交鋒
有無乘機劫虜良民財物某處官兵有功某處官兵有
罪仍將原委紀驗官功次冊內查審對證有無任情摺

撫虛冒不實弔取原獲首級耳記辯驗有無孩幼婦女
務要逐一據實勘報不許容情遮掩所據承委官員宜
各秉至公仰承朝廷保全生靈慎重賞罰特遣近臣重
命作急查勘分別官兵功罪輕重等第通查前後失事
人員逐一明白具由備細造冊仍將賊首陳卿會同研
審真情照依律例議擬具招一併呈報以憑會同撫按
衙門覈實具奏施行緣係查勘平賊功罪關係國法民
命事體重大毋或拘徇寅寮私情畏避上官勢分有所
推避及苟且塞責含糊應文查勘不實定行從重叅劾
決不假借責限五日回報如有引嫌避怨不聽委勘亦

要明白呈報以憑叅奏施行及節經會駁覆勘去後今
據叅政邵錫伍全僉事賈啓張庠會呈問得首惡陳卿
狀招有山西已獲監故父陳琦先獲監故伯陳曩并已
獲弟陳奉已斬首陳相等河南已獲故叔陳良陳鐸堂
弟陳文表陳子隆族姪陳朦眼斬首堂叔陳聚米堂弟
陳鉞俱住青羊山內地方谷堆底石返頭等處節年舉
放錢債與山中各村及四外流來賊人明知劫來財物
加倍取息因而得利作爲窩主正德十年八月內有山
西已獲強賊陳廷不合糾同陳琦陳曩與先獲監故族
叔陳遷并劇賊王廷祿等強劫本州并陵川縣居民韓

慶等家銀兩衣服等物正德十一年正等月內陵川縣
申蒙撫按衙門行委山西吳都指揮督率官軍止將王
廷祿等捕獲問擬斬罪呈蒙詳允監故相埋訖照拏陳
琦陳廷等未獲彼父陳琦將卿納充本縣聽缺吏後叅
禮房典吏正德十五年五月內卿後滿轉叅潘府長史
司刑房典吏避難逃回革役正德十六年正月初四有
山西已獲賊首陳訪因事不合將本縣居民陳道女毆
死告發本縣問擬陳訪同謀共毆人因而致死下手絞
罪招申巡按衙門詳允節蒙會審詳真監候轉詳問彼
有陳曩恐人捕拏投在本縣去任知縣楊盈名下作爲

祗候在縣往還因而無人捕捉本年八月內有本縣居
民張安明知陳琦等結購賊衆不時潛去劫掠人財不
合窩留往來伊家歇住嘉靖元年十月內有未獲強賊
萬得才牛恭各不合糾同陳遷等前往河南安陽等縣
各村流劫彼時陳遷與先獲監故強賊袁廣等將校尉
王弼懷孕妻殺死本年十一月內又劫林縣丁葉村黎
城縣趙城村居民王總等家銀錢絹布等物俱馱送陳
曩家內知情均分訖嘉靖二年三等月內有山西已獲
強賊秦彪與陳遷等不合仍同前賊并已獲監故賊首
秦虎龍等劫掠陵川等縣居民楊友萬等各家頭畜財

物楊友萬等并各地方告稟陵川縣及澤州通申蒙山
西撫按衙門俱行分巡冀南道王琳督令各縣委官捕
拏先差快手王廷瑞將陳曩捉獲發縣監候間彼有楊
盈因與陳曩情熟令本縣已問發充軍張倫將伊保領
在外續蒙王僉事督委高平等縣典史鄭良等各帶快
手民壯人等入山襲捕復將陳曩捉拏陳遷與秦虎龍
等拒敵殺死民壯康小邦等四名砍傷兵快李紀等十
六名本年五月內王僉事又委黎城縣知縣今陞太原
府在逃通判楊良臣齎執本道告示招撫脅從良民彼
父陳琦隱下前惡混同被虜陳宣等男婦六百餘名口

一槩俱作良民以致准信招撫下山查發寧家又蒙本
道督併官兵將秦虎龍等拏獲與先獲陳曩等俱問斬
罪具招呈蒙撫按衙門詳允將秦虎龍等監候審決未
獲強賊通行壺關潞城二縣責差今死地方張得山老
人韋臣各領兵快緝拏陳遷得知糾同各賊節將張得
山韋臣殺死各縣將情申報王僉事督率官兵將卿并
陳遷等擒獲被陳遷招攀卿等同伊劫財殺人致蒙王
僉事將卿等問擬斬罪照例梟首具招呈蒙撫按衙門
詳允監候會審照拏萬得才等未獲後陳遷等陸續在
監病故相埋訖嘉靖三年二月內卿將情具本令庶母

王氏奏行山西巡按王御史轉行分巡道張文魁勘問
牌行本州提弔人卷本年七月廿一日夜陳訪又不合
越獄逃來本山依附爲盜向未拏獲本年九月內本州
批差已發落快手謝鉦等管解卿并事內楊盈等赴道
行至汾州東關卿不合脫逃回山潛住止將楊盈等解
道審究謝鉦等畏懼刑責妄招受卿銀四兩賣放虛情
在官致蒙問擬謝鉦受財故縱絞罪崔岩等爲從及楊
盈等應得罪名招呈巡按衙門詳允發落訖牌行本縣
照拏卿等未獲本年十等月內卿因王僉事問擬死罪
逃避山中要得據險聚衆踵父爲盜因而肆行流劫及

拒敵官司差人捕拏謀同陳奉陳訪陳廷糾集山西已
獲強賊石龍王英等河南已獲強賊王仲興等各不合
與父陳琦弟陳相并山西已投首強賊黃選等共一百
六十餘名各故違強盜殺人放火燒人房屋姦污人妻
女并積至百人以上不分曾否傷人俱隨卽奏請審決
梟首事例俱聽卿等父子調度往來山西河南地方流
劫鄉村殺人放火縱橫爲患嘉靖四年二月內卿與陳
奉石龍王英率領劉倉等八十餘名各不合強劫本縣
王莊里居民路囊王榮等家財物并將李柰馬匹強搶
入山及將已故民人石廷相妻常氏劉文義妻王氏男

女俱強虜上山卿將常氏姦收陳琦將王氏姦收陳相將劉文義女姦占各爲妾本年五月內王榮與李柰因被卿等劫害各將前情告蒙巡按張御史批行帶管分守冀南道今陞任副使韓邦奇案行本州督併各縣掌印巡捕官卽拏彼有潞州判官項鏞吏目董光祖潞城縣知縣蹇賢典史何智壺關縣知縣張友直未到典史吳淮各不合失於撫捕嘉靖五年五月十八日卿等不合因讐將王榮殺死本年四月內有王榮弟王進朝與李柰各將卿等劫殺等情具告撫按衙門批行分守冀南道張文魁會同分巡道宋欽案行潞州并潞城壺關

二縣及潞州衛緝捕彼有知縣蹇賢并張友直巡捕典史何智并吳淮本州吏目董光祖千戶宋琳各不合與本衛掌印指揮秦洲不行併力捕拏以致卿等劫財殺人肆行無忌本月十五日宋僉事將設備防剿事宜通呈撫按衙門蒙巡按馬御史詳批相機而動兵家制勝之策所議依擬行仍候巡撫詳示間張叅議亦將本縣申稱卿等據險不服等情要將動調官軍征剿緣由具呈蒙山西鎮守張太監俱批依擬會同分巡道動調所屬衛所下班官軍州縣巡捕快壯及精壯鄉夫人等申嚴號令督率剿除本年五月初八等日蒙守巡道會委

高平縣知縣王準長子縣知縣劉耕親詣查勘賊情并將捕拏卿等方畧議呈本院蒙批依擬通行本州并潞州衛及潞城壺關黎城等縣協力擒捕本年九月內常氏見卿兇謀恐後連累夤夜脫走下山將情告蒙巡按馬御史批行分巡道備行州衛縣嚴謹緝拏卿等賊衆各因官兵設備頗嚴未敢下山劫掠嘉靖六年正月初一日叅政李際可僉事章綸本年四月內卿計同陳奉陳訪等各不合與陳琦陳相分投招集本縣并壺關黎城等處山西已投首強賊李祿李景方等七十餘名并山西已獲監故強賊陳的和等河南已獲監故馮大川

等一百四十餘名山西已斬首強賊王得等河南已斬首殷得山等二百餘名各因卿等行劫得利俱陸續投卿父子時常在山操演武藝及私造槍刀等器聽卿分遣四散劫掠自是賊黨愈重勢甚猖獗巡捕人役不敢入山擒捕本年五月初二等日卿等率領賊衆各騎馬羸執持槍刀等器前到河南修武縣地名西村卿與陳奉等各不合故違前例將居民趙洪等各家房屋放火燒燬殺死居民劉鉞李氏等四名截傷趙舉等七名劫出趙洪等家財物又到本縣恩村鎮舉火燒燬本鎮居民張玘等家房屋殺死居民張宿秦仲等九名及截傷

張甫等一十四名彼有該縣兵快地方人等捕捉卿等
各又拒敵殺死快手張恩搶劫張玘等各家財物不計
其數復從恩村鎮回還轉向澤州東平等村陵川縣義
門等里殺死居民王文等三名及戳傷王漢張經等十
名強劫居民樊世威等各家共銀一百七十餘兩銅錢
三萬六千餘文絹布衣服四百餘件雜粟二百餘石馬
羸驢一十六頭連夜復回山內分用訖本月廿四等日
該澤州并陵川縣將前項賊情通行申報間章僉事宋
僉事會同李叅政具由呈蒙鎮守張太監巡按張御史
准委指揮秦洲并寧山衛指揮熊夢弼及澤潞二州并

屬縣巡捕官各帶軍兵緝捕間本年六月內今閑住常
都御史接管巡撫本月初五日該河南分巡河北道屠
僉事訪得大勢強賊係山西青羊白坡賊徒備由通呈
山西撫按衙門批行守巡冀南道嚴督各該委官會約
相機處捕間秦洲緣事被提改委本衛指揮沈清吏目
董光祖典史何智澤州吏目張雲鵬高平縣典史張鏗
襄垣縣典史翟儒林各整兵間本月廿三日指揮熊夢
弼等督同委官董光祖等領兵入山襲捕行至地名葫
蘆嘴遇見卿等率領賊衆三百餘名拒敵官兵彼有熊
夢弼沈清各不合不行奮勇督兵勦捕董光祖等各不

合不行併力擒拏以致卿等各不合將典史何智并伊男何廷佑打倒剝奪衣服器械又將何廷佑肚腹戳傷及將民壯宋曩戳死并戴經等二十餘人打傷各官兵遂皆退散該潞城縣具申常都御史蒙批仰守巡道親詣督併刻期剿捕又該澤州亦將卿等拒敵緣由申蒙常都御史批仰各道作急議剿先將方略馬上差人齎報本年七月初十等日該帶管分巡道王副使會同李叅政俱至潞州查訪青羊山拒敵賊人係卿等父子爲首與澤州所申相同彼因草本茂盛難以進兵具由稟報常都御史隨蒙出給告示行委知縣楊良臣齎執入

山招撫彼卿不合心懷矯詐假設懇情并捏掩惡虛詞一紙遞付楊良臣致蒙本官准信通將青羊等村居民史腹寧等一千餘名作爲聽撫其外來流民申宣牛清等二百餘名俱作趕散開具揭帖呈報李叅政等通呈撫按衙門照驗訖彼卿又不合懷疑分布賊衆守險應敵本月十三日陳相糾同各賊下山將壺關縣地名角兒戰寄住今故民人許朝伊妻李氏搶虜上山陳相將李氏姦占本年八月內常都御史會同巡按張御史看得卿父子兄弟積惡已非一年貽患不止一處今又結黨多至數百仍前劫殺河南山西兩省地方且又拒敵

官兵殺傷人衆惡已貫盈罪同謀叛必須急爲剿絕庶足少快人心但又委差楊良臣雖稱撫安未見有何實跡恐彼自知理法難容嘯聚日久貽患愈大案行都布按三司掌印官會同本道守巡官從長計議進剿方略必使巢穴無遺種類俱盡作急呈報本年九月內爲恤刑事蒙審錄劉員外將謝鉦辨問杖罪奏放訖本月初二日蒙李叅政王副使會議得卿自聽撫之後再無出山劫害但彼懷疑未敢擅出仍令楊良臣面諭陳卿父子等限兩月以裏將賊徒卽擒送官如是脅從放其歸業若過限無有聽撫實跡方行剿捕備由回報按察司

本月十三日該山西按察司等衙門唐龍等覆議得本地之人善良尤多賊衆之內脅誘居半兵端似難輒開事體尤宜審處故守巡本道先主撫處之說勢若近緩計本從長合依所議示以大信坐委潞州知州宋璉選帶公正屬官親詣撫諭若或執迷不改解散無期方行調兵征剿備由會呈常都御史蒙批依擬仰行守巡道相機而行本年十月二十四日李叅政會同王副使選委澤州知州王朝雍知縣王準劉耕會同知州宋璉入山招撫未報間彼有常都御史不合不行審度事機從宜撫處輒便輕率請兵具本奏行兵部查議覆題咨行

山西巡撫常都御史河南巡撫蔣都御史起調附近衛所州縣官兵委官管領約會夾攻務將卿等有名賊首緝捕得獲其餘脅虜聽令解散隨蒙常都御史會同鎮巡衙門行委山西都司霍錦統領太原左等衛官軍一千員及委汾州知州郭鏗統領潞州襄垣縣等州縣兵夫二千名前來剿捕又委典史吳淮帶領壺關縣鄉夫一千名分布把截仍委分守李叅政督管糧草分巡王副使知州王朝雍平遙縣知縣韓廷學紀驗功次隨蒙常都御史出給告示發行守巡道分給各委官差人入山黏貼曉諭脅虜之人許令投降解散又蒙河南蔣都

御史行委都指揮李鳳鳴指揮吳捷丁始然彰德府同知王都統領官軍一千五百員名約會進剿間該原委知州等官宋璉等止招撫伯母張氏同伊男陳鐵棍等并原擄王氏男女下山入城卿等不合佯爲聽撫不行出山本年十一月內王副使致仕回家僉事楊朝鳳帶管分巡道彼有張安不合節將探聽得上司調兵剿捕情由報漏與卿率領賊衆潛伏據險迎敵本月十二蒙常都御史案行守巡道分布官軍防守相機勦殺本年十二月初九日李叅政楊僉事因霍都司領兵未到遵照常都御史明文先行分布指揮秦洲帶同潞州衛指

揮汪鎧薛朝輝顧瀾千戶和洪李璋等百戶黃金楊臣
等統領舍餘旗軍秦潮等共七百二十七額前來青羊
村西路隘口把截彼有常都御史又不合安坐省城失
於調度李叅政楊僉事各不合申諭欠嚴指揮汪鎧千
戶和洪百戶黃金等各亦不合與薛朝輝等不行併力
防守被卿謀同陳奉各不合與陳琦陳相等率領賊衆
三百餘名各執槍刀等器撲出青羊里山口當將指揮
薛朝輝并本衛軍人賈但兒等二十三名及秦洲弟秦
潮俱射戳傷重身死各官兵力不能支遂皆奔潰又搶
去官軍披甲長槍腰刀弓箭官馬等物秦洲等回報李

叅政等具稟常都御史看得卿等敵殺官兵勢甚猖獗
乞要請命副總兵趙廉督兵進剿具本奏行兵部查覆
間蒙常都御史議行李叅政等將先陣亡官軍家屬優
卹訖本月十七等日卿與陳訪石龍等各不合糾同各
賊一百餘名搶劫本縣張井等村居民張潮并劉得隆
等各家粟穀九十餘石又殺死張潮合家男女大小共
七名口放火將房屋燒燬劫去伊家銀錢衣服等物嘉
靖七年正月初三日卿不合驅令在官李景才亦不合
依聽前去本縣約會王氏并伯母張氏要行劫取回山
被快手拏獲押送守巡道轉發宋知州審問李景才又

不合畏刑妄招因讐譖卿等殺死張倫等人口虛情在
官將李景才監候問罪呈詳間本月初五日蒙李叅政
楊僉事因霍都司領兵已到移文責付河南原差快手
石昂等賫送河南守巡河北道的於本月初十日約會
督兵并進夾攻本月初十日都司霍錦知州郭鏗各領
原調官軍民兵進剿及河南守巡河北道叅政陶諧僉
事溫濡催督原委都指揮李鳳鳴指揮吳捷丁始然同
知王都統領前項官軍亦於本日由林縣入山夾攻本
月十八日都司霍錦督領太原左衛指揮王振李爵右
衛指揮鄭麒千戶董儒百戶俞瑗前衛指揮王鉞黃金

千戶楊鈺潞州衛指揮汪鎧秦州顧瀾千戶和洪李璋
等百戶陳震阿功張讓汾州衛百戶薛文興沁州所百
戶王蚤知州郭鏗潞州同知倪晷督率澤州吏目張雲
鵬沁州吏目夏羸州屯留縣縣丞何應漢陵川縣主簿
謝景安襄垣縣主簿朱璽長子縣典史祁仕翰高平縣
典史張鏜潞州千戶牛賓并醫官宋楠各帶旗軍兵夫
協同進剿知州王朝雍知縣韓廷學各隨軍紀驗俱行
至地名黃松嶺彼時張安又不合漏泄進兵消息卿與
陳奉陳訪等聞知各又不合與陳琦陳相等率領賊衆
五百餘名突出拒敵彼有都司霍錦不合不行嚴督官

兵設策制勝指揮王振鄭麒等千戶楊鈺和洪李璋等
百戶陳震阿功各不合與李爵等不行奮勇督兵攻戰
知州郭鏗同知倪豸各不合不行相機進剿吏目張雲
鵬夏瀛洲縣丞何應漢主簿謝景安朱璽典史祁仕翰
張鏜千戶牛賓各不合與宋楠不行協力夾攻被卿等
賊衆殺死指揮李爵秦洲千戶陳璽董儒百戶張讓薛
文興俞瑗醫官宋楠八員及殺死王振等部下軍人閻
子恣等三十九名又將指揮顧瀾并軍人成九子等四
員名俱戳砍傷重回家身死被傷知縣等官韓廷學朱
璽并旗軍宋智等四十五員名又將知州郭鏗王朝雍

俱執虜上山又搶去官馬長槍斬馬刀腰刀弓箭等物
彼有河南都指揮等官李鳳鳴吳捷等各承委前到尖
綻口及池兒長嶺約會夾攻因聞山西官兵失利各不
合不行前進各就掣兵回還河南去訖本日卿將郭知
州等執送谷堆底莊所拘繫韓廷學將卿等拒敵等情
呈報李叅政楊僉事節次稟報常都御史穆御史查奏
間蒙將陣亡官軍家屬優卹訖續該兵部將鎮巡官前
奏卿等敵殺官軍薛朝輝等緣由議擬覆題咨行常都
御史調取三關馬步官軍委都指揮等官相機誅剿失
事守巡等官李叅政楊僉事并潞州及潞州衛潞城縣

各掌印巡捕等官各住俸戴罪殺賊本月廿五等日卿等聞知已投首賊人原得祿引領官兵入山剿殺要得報害率領陳子懷等二百餘賊各不合撲入伊住圪壇村當將原得祿族侄原法等男婦七名殺死又到本縣紅底莊及東溝裏搜劫居民李廷相平滔等各家銀錢細布雜糧牛羊等物本年二月內新任僉事陳大綱接管分巡道本月初二等日卿又率領陳訪等三百餘賊各不合劫掠壺關縣崇賢村居民平亨等一十三家并申等坪等莊居民申萬羊等八家銀共三百餘兩銅錢共二十五萬羅段衣服綿布雜糧牛馬等件又將平亨

等本村居民牛鎧等八口殺死本月初七日又蒙山西巡按穆御史差委布政司案牘高雷齋文令楊良臣入山諭卿放回知州彼父陳琦自知窮兇極惡欲要脫免誅剿計令卿等各不合與河南已獲監故強賊王章共謀捏寫訴詞及捏稱王知州等爲招撫大衆以安地方事呈文各一紙俱遞與楊良臣仍將各官拘留必欲取贖王氏等回山楊良臣將前文交與高雷呈繳穆御史批行按察司公議間蒙穆御史會同清軍王御史將卿等敵殺官軍秦洲等緣由及常都御史亦將前情各具本奏行兵部查議覆題轉行趙副總兵及常都御史案

行守巡官募選鄉導槍手聽候征剿本月十四日守巡道覆差楊良臣帶領王氏并伯母張氏等入山曉諭卿等方將知州郭鏗王朝雍令楊良臣領送下山各回任訖彼有高平縣聽選監生李克紀因見撫按衙門節奏卿等爲患陳言要選謀略過人正官撫卹山寨設法自擒首惡及於本處立縣緣由具本奏行吏部移咨兵部着將本生赴常都御史軍前贊畫聽用本年三月初一等日李叅政復差楊良臣陳僉事差委本州同知宋縉儒學訓導趙從虎等將奉到恩旨刊刷告示令各官齎執入山招撫卿等又不合負固不服該兵科商給事中

看得常都御史調度無方致將知州虜去指揮殺死乞要移文切責任俸以圖後功緣由具本奏行兵部覆題待事寧通查功罪定奪隨蒙穆御史將知州王朝雍等自賊巢回還并前項呈文訴詞情由及看得楊良臣執稱深入撫還二官似爲可嘉又蒙常都御史亦將前情并卿等劫財殺人及議調山東副使牛鸞槍手剿捕等情具本奏行兵部查議覆題咨行常都御史轉行守巡道應撫應剿從宜施行及將楊良臣改註太原府通判仍留軍前聽用并行山東牛副使挑選慣戰槍手操練聽調本月十六日李克紀會同楊良臣入山撫諭卿等

陽順陰逆仍捏訴詞三紙并將各家男婦八百餘名口開報李克紀與楊良臣作爲就山招安回還本縣造冊連訴詞呈繳常都御史穆御史蔣御史議奏間本月二十日蒙常都御史差承差齋捧黃榜二道馳送陳僉事當將一道懸掛本州城內又將一道差老人張文美齋捧入山張掛曉諭卿等因前楊良臣李克紀許令就山招安得遂所欲各不合違悖恩旨不行出山投首壺關潞城二縣節將卿等劫掠緣由申報陳僉事會同李叅政楊僉事看得卿等稔惡不悛出劫無常乞要督發兩省兵馬相機撫剿具呈撫按衙門蒙常都御史具本奏

行兵部覆題咨行本院從宜撫處若賊情重大山東河南官軍徑自調用本月二十六日卿訪知儀賓郝世昌家人郝鑑要行指引河南兵馬進山剿捕不合使令王鑑等九十餘人前到伊莊當將郝鑑并妻男俱各殺死本年四月初八日楊良臣李克紀呈稱就山招安賊衆八百餘名要行止兵賑濟存卹計擒賊首等情具呈陳僉事會同李叅政楊僉事通呈撫按衙門蒙常都御史批據今所處非惟玩養後患抑且有違明旨仰從長議處務令賊首就擒卽日出山自訴作急呈奪又蒙穆御史批地方大事須協同計議而行隨該各道與李克紀

木沙考言
從長計議招撫轉呈常都御史未蒙允行續蒙常都御史將卿等招撫不從節劫財物等情請命魯總兵統兵征剿具本奏行本院督調兩省官軍相機撫剿及查失事人員又蒙常都御史將應撫應剿緣由具本奏行撫按衙門案行李叅政陳僉事并霍都司再行差官入山曉諭卿等禍福利害如果畏罪悔過將先日敵殺官兵賊首計擒送官卽免其罪果有誣枉聽其具訴伸理倘若執迷不悛調集主客官兵相機剿捕各遵行間本月廿九日卿又不合將本縣樂人王良臣女搶入山中姦占爲妾本年五月內蒙兵科孫給事中亦將卿等爲惡

不悛乞要早調人馬責付謀勇將官剿捕等情具本奏行兵部議題備行總兵官魯綱統領所部并京營官軍前去衛輝彰德附近地方駐劄提督殺賊山西河南二省守巡等官所部官兵俱聽節制調遣及行常都御史移在潞城臨近去處與魯總兵仍照前撫處本月廿七等日有被虜平人張法張玘等各畏兵臨被殺陸續逃走下山被卿巡山賊人殷得海等捉回卿等慮恐各賊效尤奔散要得誣執抵罪各不合將張法等九名口俱作殺死官軍首惡綁送楊良臣李克紀收發潞城縣監候楊良臣具由呈稟本縣蒙申守巡道轉發楊良臣勘

問本年六月內楊良臣要得苟且行事又不合隱下卿等節次劫殺情弊主令李克紀出名奏稱深入賊巢共招撫脅從男婦八百餘名及陳卿父子束手聽服乞要賑濟給財蓋房等項虛情具本奏行兵部移咨巡撫衙門轉行該道查勘間又蒙蔣御史看得卿等戕殺官軍違背詔命乞要速加掃滅以伸國法等情具本奏行兵部於本月廿六日覆題備行河南巡撫潘都御史移在彰德等處駐劄山西巡撫常都御史移近潞城地方各調官軍民兵督委陳僉事崔副使與魯總兵所統官軍協力會謀待天氣稍涼相機合兵進剿及調牛副使所

統馬步官兵前來若卿等果能束手投首及將敵殺官兵兇犯擒拏送官明正典刑仍照前撫處各遵行間本年七月十八日陳僉事等行委潞城襄垣二縣縣丞盧萬張珽齋捧黃榜入山申諭朝廷洪恩寬宥令卿將敵殺官軍人犯擒拏送官就赴軍門投訴卿等又不合執迷不從仍前負固拒守本年八月內張法張玘等妄招敵殺官軍虛情口詞楊良臣具揭開呈陳僉事恐有不的提取各犯到道審得張法等俱係被虜平人委無敵殺官軍情由彼有王玘又不合妄招在官申川張景隆等謀令卿攢錢買免楊良臣等就山招安虛情致蒙行

林州奏議
忠禮書院
拘申川等到官各亦不合畏刑妄招卿向一十七莊攢
錢一百餘千過送楊良臣李克紀接受虛情致蒙取供
叅呈間本月初七日魯總兵因天氣稍涼領兵自河間
起行本月初八日卿又不合率領王仲興等七百餘賊
前到林縣地名任村將居民李林路臣郭文雪俱各殺
死放火燒燬房屋搶劫銀錢頭畜衣服等物隨有指揮
吳捷等領兵前來追捕各賊奔散回山本月十五日蒙
潘都御史行令領兵翟副使先到林縣整點原調官軍
民兵共二千零三十八員并調宣武衛官軍三百二十
五員就在林縣操練相機截殺又委祁僉事召商羅買

糧料草束預備軍馬支用本月十八日陳僉事出示召
募勇夫并報効之人有潞州衛別項問擬立功等罪指
揮柴山等千戶楊輔等百戶花銘張楫等投赴本道自
願出力剿賊彼蒙常都御史親詣潞州將調到三關中
軍振武衛指揮曾宣等各部下官軍共一千一百餘員
俱委陳僉事統領將柳勛選作本營中軍柴山等隨軍
及打造火車五百兩日逐團操聽候征剿并出給告示
曉諭居民兵賊交鋒敵殺之際各宜趨避不許混入賊
中致難別白自取追悔隨蒙潘都御史遵照欽降黃榜
出給告示轉發翟副使并守巡等官差人遍掛山隘鎮

忠肅書院
店諭令卿等投首又蒙陳僉事分布李承祖領兵在於
壺關縣胡廣領兵在於潞城縣各駐劄督同二縣民兵
把截防守彼有魯總兵明知久奉欽命不合在途遷延
不行急趨地方駐劄合兵進剿卿等因聞山西河南動
調官兵前來剿捕謀同陳奉陳訪等要得脅虜人衆以
備迎敵各就不合將本縣并壺關黎城等縣近山居住
民人常得金等四十餘名及投首餘黨陳文義并安插
招降被脅牛子經等男婦二千三百餘名河南已釋放
李貴劉良興等俱陸續脅虜在山編成總小甲花名簿
籍四扇大張聲勢禦敵官兵本月廿四日卿等分遣夥

賊秦彪劉倉等并脅從二百餘名各不合前去臨近鄉
村劫掠指揮李承祖聞知領伊部下官軍并該縣兵快
人等前來追襲至壺關縣地方羊窰底遇賊對敵彼有
李承祖不合不行奮勇攻剿被賊殺死旗軍周伏吉義
等四名及劄傷官軍臧清等二十一員并搶去官馬一
十匹被壺關縣鄉夫楊福成等擒獲脅從一名王敦各
賊回至潞城縣北社底被指揮胡廣等領伊部下官軍
與賊對敵就陣擒獲強賊一名劉倉比時陳僉事即欲
督兵剿賊節次呈稟常都御史蒙批候魯總兵至日會
兵進剿前獲強賊因卿未免不會奏報本年九月初三

日卿與陳奉等因聞羊園子鎮鄉夫引領官兵入山截殺要得報害率領石龍等三百餘賊前去本鎮地方將居民馬仲良一家三口宋大本一家三口又將李文惠妻子一家三口及李太倉等共六十九名俱各殺死燒燬鄉夫宋大川等房屋九十二間本月初五日蒙潘都御史調遣河南都指揮徐溥毛世威等守備王秉彝郭舉等千百戶郭璽徐憲等帶領宣武陳睢歸德等衛官軍嵩永等縣毛葫蘆并衛輝彰德開封等府義勇民兵共三千餘員與同原在林縣守把官兵挑選精銳四千員責付領兵翟副使操練其餘分委守巡陶叅政溫僉

事在於各隘把截間本月初八日魯總兵領河間并京營官軍七百餘員方來本州駐劄摘撥京營指揮應永等兵馬在於本縣住候進剿間卿聞知亦分遣陳相陳良等領賊并被脅人七百餘名在於洪梯穿腦等處迎敵河南官兵卿同陳奉陳訪等領賊并被脅人一千餘名在於李莊口等處迎敵山西兵馬及不時出劫報讐殺人本月十二日蒙潘都御史訪知儀賓郝世昌蓄有家丁二百餘名熟知山險可作鄉導當即委令本官齎執招撫脅從旗榜前到地名張家灣等處招撫被脅岳成等男婦一十五名本日卿又令陳子懷等二百餘賊

搶劫壺關縣辛村居民閻崇等黑虎村居民宋友倉等各家牛羊雜糧并絹布衣服等物又將各家房屋放火燒燬彼有魯總兵不合不行設策追剿却又奏請添兵以圖掩飾已過本月十四日林縣典史王相招撫男婦劉彪等九十五名本月卿遣賊郝文義等一百餘名前到本縣黃牛梯李家莊地方劫掠有京營按伏指揮應永領軍對敵被圍霍都司聞知督令指揮曾宣統領人馬前來策應郝文義等又不合率衆衝敵劄傷軍人王愷等四名彼有郭演郭文深趙洪王惠等一十四人被虜賊營乘便跪出彼有曾宣不合不行申嚴號令以致

部下各軍不辯是否強賊混將郭文深等一十四名就行斬首送官審驗本月十五等日卿又遣王鑑領賊三百餘名搶劫黎城縣竇口等村居民張美等壺關縣杏城等村居民申鑑等本縣慢流等村居民魏子成等各家錢布雜糧并牛羊等物又殺傷居民王大川趙文舉等家人口彼有魯總兵獨受提督重任不合頑坐潞州不行遣兵遏截以致賊無忌憚日益縱橫節次劫財殺人燒燬居民房屋數多本月十七陳良陳相引領夥賊朱公正等一百餘名到尖綻口搶劫當被河南守隘指揮梁文督領百戶馬凱義官史韜崔奉并鄉夫楊聚良

等三百餘人併力截殺射傷不知名夥賊十餘名生擒朱公正等五名迭守巡道叟問間比卿差姦細閻子秀王雲等前來林縣探聽進兵消息致蒙溫僉事差軍兵張淮李文強等將各犯緝獲本月十九日蒙潘都御史帶同翟副使徐都司等親詣黎城縣會同常都御史魯總兵并牛副使陳僉事等議得山西地面頗廣而隘口平易山西并直隸山東人馬止穀分布河南地面稍狹而隘口險難該省人馬頗彀攻圍當蒙潘都御史謀畫定擬翟副使領兵由花園口王陡崖苦水嶺進直搗谷堆底分哨奇兵一枝由魯班壑進奪奔腦一枝由尖綻

口進奪洪梯牛副使領兵由李莊進陳僉事領兵由佛堂嶺進俱至石返頭入谷堆底魯總兵由羊圍子居中調度北策應山西人馬東策應河南人馬當密傳印信會帖決以十月初六日寅時進兵人定四路官兵俱用紅抹額爲記號各用本方色爲旗號各照定擬地方候期進剿本月廿二日潘都御史回至彰德府仍令郝世昌指揮梁文等齎執招撫旗面在於奔底尖綻口等處招撫被脅周子成等男婦共二百餘名牛副使統領青州左衛指揮查瑤等部下官軍并槍手共八百餘員前來本縣駐劄蒙常都御史行委李叅政督運本省兵馬

糧餉及分布郭鏗王朝雍隨陳僉事沁州知州黃海榆
社縣知縣張巍隨魯總兵陽城縣知縣于慧武鄉縣知
縣陳琰隨牛副使各軍營紀驗功次仍委楊僉事糾察
姦弊又委霍都司統領潞州等衛指揮邢守清等官軍
六百員與牛副使兵馬後繼應瑗又添撥潞州等州縣
民兵三百名赴魯總兵部下隨征各操演聽候進剿間
本月廿八日翟副使分委郝世昌吳捷丁始然梁文陸
續招撫被脅周起鳳等男婦共一百餘名本日陶叅政
督據同知王都義官崔奉等在於尖綻口擒獲黨賊宋
得營趙紀公等十九名俱送陶叅政處收問本年十月

初五日蒙潘都御史將河南軍兵督令翟副史總統分
爲五嘯指揮李塘丁始然領官兵八百一十五員爲前
嘯指揮吳捷儀賓郝世昌共領官兵并家丁一千五十
員爲左嘯守備郭舉統領指揮薛守直領官兵七百四
十五員爲右嘯守備王秉彝統領指揮陳厚等共領官
兵六百一十四員爲後嘯指揮湯卿領官兵七百三十
六員爲中軍都指揮徐溥贊畫中軍兼都催前嘯分守
陶叅政督率官兵一千員名守把魯班壑蟻尖寨桃園
口兼催奇兵指揮吳捷等并遊兵指揮余尚用等分巡
溫僉事督率官兵一千員守把尖綻口盤陽口劉家梯

兼催奇兵指揮毛世威等遊兵指揮于宗仁等又委祁
僉事帶領衛輝府同知盛時雍隨軍肅陣督餉紀功又
議令翟副使領李塘等四嘯官兵同祁僉事徐都司由
花園口吳捷郝世昌一嘯官兵由魯班壑毛世威等一
枝由洪梯間道二路進山當日牛副使督統前項官兵
八百員并霍都司統領前項官兵六百員由潞城縣進
兵行至李莊迤東撞遇賊首石龍王豸等率賊五百餘
名各持長槍出山劫捨有指揮查瑤督率官兵奮勇就
陣斬獲從賊王得實并不知名強賊首級共七顆割獲
耳記五副各賊敗遯上山本日晚蒙潘都御史密令指

揮吳捷儀賓郝世昌等夤夜引兵攻奪奔腦初六日寅
時卽遇賊首殷得山等率衆拒敵有吳捷等督兵奮勇
將賊殺敗就陣斬獲殷得山等首級五顆副生擒王仲
興栗友良招降被脅張子深等男婦七十四名趕至莎
草嶺又遇賊對敵各賊敗走官軍占奪七子嶺等處燒
燬安陽門樓等賊巢比卿使令陳留狗前來探聽河南
消息被夜不收侯隆將伊盤獲本日翟副使統兵至王
陡崖魯總兵統兵至羊圍子陳僉事領兵至晉莊各割
營比有石龍等率領賊衆迎敵查瑤部下官兵就陣斬
獲得賊首級一顆石龍等敗走入山牛副使隨將伊領

官兵首剽賊鋒情由呈報常都御史奏報訖楊僉事亦
差鄉夫王紀張朝等齎執降旗入山分投招撫間彼有
常都御史因撫剿久無成功奉命行取回京後因草塿
山失事行令回籍閒住蒙新任王都御史前來接管巡
撫本月初七日魯總兵至佛堂嶺陳僉事至羊圍子山
各劄營隨蒙王都御史案驗內開撫剿機宜差人齎送
陳僉事遵行間本日晚翟副使領兵至苦水嶺密令指
揮李塘與守備王秉燹指揮陳厚等選領精兵一千二
百員乘夜直搗賊巢又遣火牌督調吳捷等兵前來策
應本日溫僉事亦督發指揮毛世威梁文等官兵奪取

洪梯與賊對敵斬獲守隘強賊耳記四副初八日寅時
指揮李塘吳捷等官軍撲至賊巢谷堆底卿等率領賊
衆前來對敵吳捷等奮勇衝戰間翟副使統領大兵亦
至將卿等殺敗卿與父陳琦領賊一枝由蘆芽嶺上樂
莊山腦王朋等一枝入正北後山梁萬良等一枝上神
河小寨官軍追至樂莊復戰數合就陣斬獲首級耳記
共五十八顆副彼時吳捷薛守直鄭存毛世威各不合
紀律欠嚴以致部下軍兵混斬男婦首級十二顆生擒
賊首王章從賊王得才李貴等五十餘名有指揮陳厚
家人陳竹奮身追趕當被夥賊白首惠用槍劄死卿等

丟棄原奪山西官軍衣甲并潞州衛紅字號弓箭槍刀
奪獲馬羸頭畜有指揮鄭存等就陣招撫被脅李新莊
等男婦一百餘名俱送盛時雍驗出男婦首級不合容
隱不行追究斬首人役止將首級驗退令薛守直另行
收寄本日未時魯總兵統領兵馬繼至陳僉事統兵石
家嶺先遣指揮曾宣等領兵於本日申時馳至智度寺
聯絡劄營與賊對敵曾宣等部下官兵就陣擒獲從賊
李奉川等五名斬獲從賊陳道倫等首級四顆彼時曾
宣不合紀律欠嚴以致部下軍人混斬婦人首級一顆
俱送知州王朝雍郭鏗驗出婦人首級王朝雍等各亦

不合不行追究斬首人役止將首級驗退彼都司霍錦
統領官兵隨營到於青羊山與賊對敵伊部下旗軍舍
餘邢梅等斬獲賊首級五顆割獲耳記一副擒獲脅從
一名本月初九日翟副使督併王守備等在於神河小
寨與賊對敵斬獲首級耳記奪獲器械馬羸牛羊陣亡
民壯邱世傑比有殷得海等敗走上山鼓領賊衆仍行
拒敵翟副使祁僉事當令義官王自強張操執打招降
旗面入山招諭殷得海梁欽等八人見得軍馬攻圍緊
急方纔下山投降餘賊猶疑不信復差檢校金鳳翔雷
雲仍同王自強跟隨殷得海等入營諭以利害當就招

撫被脅梁萬良等男婦二百六十餘名郝世昌吳捷于宗仁鄭鏗在於水漿子枯焦山等處共招撫被脅張愛等男婦共二百四十名本日陳僉事分遣官兵李承祖等統兵在於青羊西山小東峪高松嶺等地方與賊對敵擒獲從賊申萬倉劉祿等一十六名斬獲賊首級三顆本日魯總兵分遣指揮馬璽等在於高松腦擒獲從賊牛唐劉子秀等七名斬獲賊首級六顆彼時馬璽不合紀律欠嚴以致部下軍兵混斬婦人首級一顆俱送知州黃海驗出婦人首級黃海等各亦不合不行追究斬首人役止將首級驗退彼有王朝雍郭鏗黃海張魏

各又不合容隱不行糾舉本月初十日陳僉事分遣官兵曾宣等在於門樓虎窠等處地方與賊對敵擒獲賊首王英從賊王憲等二十五名斬獲賊首級十三顆本日魯總兵分遣官兵馬璽等在於樂莊山柏木都與賊對敵擒獲從賊路子叙等一十二名斬獲賊首級一十五顆溫僉事分遣梁文毛世威等在於碾鑽山與賊對敵擒斬耳記十副本月十一卿因勢窮力竭托鄉夫原得祿赴陳僉事軍營投首陳相陳奉陳訪等仍各潛匿山洞魯總兵分遣馬璽等在於虎窠山與賊對敵擒獲從賊石通等四名斬獲賊首級一顆招撫被脅常得良

等男婦六十四名奪獲弓槍一十九件徐都司家丁徐
祿與丁始然等在於石老岩招撫被脅永高等男婦三
十三名十二日牛副使分遣查瑤等前到青羊山地方
與賊對敵石龍等不合殺死槍手牛守皋被查瑤等擒
獲卿父陳琦并石龍等三十九名斬獲賊首級九顆割
獲耳記一十副擒獲脅從常子金等一十名俘獲卿妻
男二口陳相妻男女三口陳奉妻七口及招降餘黨王
豸等二百二十八名招撫被脅男婦宋得富等一千二
百餘名奪獲盔甲槍刀等器四百餘件牛羊六百餘隻
搜獲卿等原編戰策文簿四扇本日翟副使分遣指揮

湯卿余尙用于宗仁等在於秦光枋等處與賊對敵招
撫被脅宋子朝等男婦共一百二十名擒獲陳良等八
名斬首級耳記共一十副及奪獲馬羸驢牛羊共一千
餘匹器械二百餘件陳僉事分遣官兵曾宣等在於石
返頭等處地方與賊對敵擒獲從賊梁子成陳穀米等
五十九名斬獲賊首級一十二顆曾宗等部下軍人程
思明等擒獲脅從李惠陳賓等三十名俘獲卿男陳路
長并賊屬靳邦道等九十一名招降餘黨李得富等三
十二名招撫被脅路堂等男婦六百名奪獲盔甲槍刀
等器共八百四十件搜獲段紗紬絹梭布衣服等件共

本洲奏議
一千三十件馬牛一百九隻驢羊九百四十五隻彼有
楊僉事令鄉夫王紀張朝等在於王莊等地方招降餘
黨申子雲等一十四名招撫被脅蔣子忠等男婦一百
二十七名隨該牛副使陳僉事等各將擒斬招降緣由
節次呈報王都御史巡按穆御史巡鹽蔣御史又該翟
副使等亦將衝鋒破敵擒斬緣由呈報潘都御史各奏
報訖本月十三日牛副使十四日魯總兵十五日陳僉
事十六日翟副使各掣兵回還各將擒斬過賊數并首
級耳記及奪獲器械等項俱送各該委官審記明白轉
發各該衙門監候收貯間彼有指揮薛守直又不合將

前混斬首級與紀驗過首級耳記槩送彰德府監收貯
間本日王都御史兼程親詣本州并潞城壺關二縣往
來提督撫安餘黨并被脅人口本月十九日潞城縣鄉
夫李聚良等招降賊首陳訪投送陳僉事審據本犯執
稱陳相在於東山藏匿責差原得祿并鄉夫李廷相前
去招降行至地名陸泉溝捉獲陳相令彼投降不從被
原得祿等將陳相斬首送官紀驗訖有已發落林縣鄉
夫石彪張振及不記名鄉夫等五十餘人彼因陳奉未
獲在山搜捕忽遇已獲從賊白守惠被石彪等當就捉
獲押送彰德府同知王都處收問轉呈巡撫潘都御史

奏報訖本日晚石彪等行至奔腦又遇已獲從賊宋春申能并不知名二十餘賊在於岩腦用石砍打拒捕彼時石彪等自合將各賊擒拏送官爲當各不合擅將前賊數內斬獲首級二顆耳記一副及將宋春申能擒獲餘賊奔散隨將首級耳記并宋春等俱送郝僉事處紀驗隨將宋春等發該府監候宋春病故相埋訖本月廿三日李聚良等在於谷堆底招降卿弟陳相投赴陳僉事并將前擒斬收降緣由呈報撫按衙門奏報訖又蒙王都御史將魯總兵牛副使陳僉事楊僉事各招降餘黨并被脅人口俱委分守冀寧道邵叅政親詣潞城壺

關二縣將土著山民史福寧等男婦二千三百四十九名俱安插青羊張井等里將大名等縣流寓人戶王成等男婦四十九名俱與執照發回原籍訖又該楊僉事督同知州等官郭鏗等將卿等并斬獲首級審驗彼有脅從常得金等四十四名各畏刑不敢分辨以致作賊造冊在官將首級發潞州衛器械贓物俱發本州收庫牛副使部下前獲牛羊變賣銀兩本官收領賞勞部下官兵訖陳僉事部下前獲馬驢牛羊蒙王都御史除給賞獲功官兵外餘剩頭畜行令本州變賣價銀貯庫又蒙陳僉事行委本州知州周昊指揮沈清會審得卿與

父陳琦并弟陳相陳奉俱在石坂頭谷堆底西灣莊居住原有并續置瓦房二百八十三間額地五頃七十畝開墾無額山地數處不計頃畝及審據卿等執稱前項房屋及原刼分銀錢衣服雜糧并馬羸牛羊等物除各官兵焚蕩搜獲外止遺房九十二間取供在卷又蒙王都御史將卿等案發都布按三司掌印官會問間有父陳琦并王恕等在於潞州監內白海周子名張鸞等六十名在於彰德府并安陽等縣監內各陸續病故相埋訖本年十二月內蒙欽差兵科夏都給事中前來彰德府查勘平賊功次公同潘都御史譚御史會委布按二

司伍叅政張僉事轉行該府將原發招撫過男婦并奪獲馬羸頭畜器械及斬獲首級耳記各數目查報前來會勘問隨該紀功郝僉事紀驗過功次文冊呈送本科蒙查出石虎等前項擒斬係在官兵平賊出山之後又蒙牌委經歷李麟查驗該府收貯首級數目彼時本官不知前項來歷混將首級一槩呈報本科俱蒙案行委官伍叅政張僉事查問回報行間申能申悟法各在監病故相埋訖隨該各道行准郝僉事查得前項首級委係陣前被軍兵混斬並不係紀驗之數備由回報外蒙將石彪等行提到道問擬應得罪名招呈詳允發落又

蒙本科會同譚御史審得王仲興等并監故王得才等俱係卿夥賊陳文學等俱係被脅餘黨發彰德府監候又審得袁氏陳氏等俱係賊屬趙國寶等俱係被脅平人俱發彰德府并安陽縣押送各原籍官司安插訖蒙夏都給事中親詣潞州查勘功罪案行守巡冀寧道邵叅政賈僉事會勘具招造冊呈報依蒙會委石州知州張經高平縣知縣管律公同查勘彼有潞城縣民人郭演并劉信等各將郭文深等被官兵混殺情由具告本科批行各道併行張知州等體勘間陳僉事亦將柳勛等緣由立功堪以贖罪緣由具呈本科亦批各道行委

知州郭鏗王朝雍查勘間隨蒙本科將牛副使奏繳前項戰冊文簿抄行各道亦委知州周昊查審該委官張經等各將前情逐一查明取供備由呈繳各道復勘相同續蒙欽差夏都給事中督同邵叅政賈僉事提取卿等到官審得原獲數內常得金王四等四十四名俱係脅從常氏王杭州等十一口俱係卿等搶擄各釋放寧家給親訖及審得卿與陳奉俱係首惡叛賊與陳訪兵敗力屈方纔投降王英石龍王鑑陳子懷陳廷郝文義等二十七名俱係真正強賊張安委係透漏消息窩主又審得張法張玘等六名俱係被虜平人申川張景隆

本沙奏言
忠福書院
等四名委無與楊良臣過錢情由及蒙查得卿等節次拒敵殺死指揮等官秦洲薛朝輝等共一十員旗軍舍餘秦潮等共七十八名民兵郝士榮等共六名重傷官軍民兵朱璽等共六十七名各是的蒙邵叅政賈僉事將卿等俱依律照例問擬凌遲斬徒等罪具招蒙呈本科批據勘招詞太冗至於緊要分別功罪處則又語涉掩覆不肯從公據實直指是非顯有拘避阿循而於勅諭內事理略不照應先委都司官查驗首級有婦人二顆不見查明功冊內魯都督部下斬首二十三顆緣何俱不知名又何以知爲從賊張安如果泄漏軍機仍當

以律坐罪引例充軍似涉輕縱駁行該道會同覆勘務見功罪明白使朝廷賞罰有據作急回報毋或稽延批呈繳各道依蒙行委知州王朝雍郭鏗查得前項婦人首級二顆委係領兵指揮會宣馬璽各部下軍兵斬獲原係委官驗退俱無造入紀功冊內及查得魯都督部下斬獲首級二十三顆獲功人員俱已回營彼時交敵之際不暇究問名姓委係賊巢人數又審得張安委係泄漏軍機重事以致卿等敵殺官兵數多備由具呈各道復勘明白招呈夏都給事中處照詳隨蒙本科案行伍叅政將見監審過賊犯并始末文卷多差的當官兵

押解前來仍會同張僉事隨帶查勘過功罪文冊作急
親詣潞州會同山西三司官通行會審明白一併具招
呈報各官將王仲興楊金玉殷得海王仲才路景章梁
欽俱問擬強盜得財斬罪陳文學馮有餘趙廷俱被脅
人數具招連人押帶潞州呈解夏都給事中處詳審蒙
批據勘陳卿招盜事太多凡未經到官招伏問結者不
須牽引審得馮有餘係有名賊黨梁欽王仲才情似可
矜再問擬坐中間事情與山西二司勘報不一有礙具
奏駁行該道即便查照另行案驗內事理會同山西官
再加詳勘一併會招呈報此繳各道依蒙會審得馮有

餘委係卿黨賊及審陳文學趙廷梁欽王仲才委係被
脅人數釋放訖又蒙本科會同山西巡按王御史看得
招內各次情節彼此不一有礙題奏案行山西左叅政
邵錫僉事賈啓河南右叅政伍全僉事張庠速將賊首
陳卿等爲亂緣由并各該領兵官軍功罪分別明白通
行會議停當總具招由一并呈報各道依蒙將卿等爲
亂緣由并各省進兵入山會否對敵擒斬收降餘黨脅
虜數目通行會議明白除獲功人員分別等第另行造
冊送報指揮等官王振等行聽叅提外今蒙將卿等會
議罪犯會議得陳卿等所犯陳卿除謀叛強姦又與陳

奉俱除強盜得財陳訪除同謀共毆人因而致死并越獄各罪名外陳卿合仍依原擬殺一家非死罪三人者律凌遲處死陳奉仍依逃避山澤拒敵官兵者以謀叛已行論共謀者不分首從律陳訪王英石龍劉倉陳子懷等二十三名俱仍依原擬強盜已行而但得財者不分首從律張安合改擬聞知收捕反逆賊徒而輒漏泄放敵人者律與陳奉等皆斬陳卿等三十五名俱決不待時陳奉與陳訪等各照例梟首示衆張安秋後處決張法張玘等十一名俱仍依不應得爲而爲之事理重者律各杖八十張法等俱有大誥減等各杖七十申川

係守制吏照例納米折穀贖罪張經係軍張法等九名俱民審俱無力各的決查發守制着伍寧家陳卿陳奉仍盡謀叛本法兄弟三人妻小俱給付功臣之家爲奴財產入官陳卿等俱牢固監候呈詳奏請施行照出陳卿陳奉等財產除官兵焚蕩搜獲外石返頭見遺房屋九十二間谷堆底西灣莊額地共五頃七十畝開墾無額山地數處不記頃畝三處房基一百九十一間俱各沒官撥給無產貧民住種地土起科納糧河南官軍得獲各賊原刼馬羸牛羊等畜共二千一百六十四匹頭畜內除馬羸八十一匹頭給軍騎操其餘俱發彰德府

變賣價銀一千八百二十八兩四錢二分旗鼓弓箭盛
甲銅銃槍刀牌杖等器共九百五件發解河南都司并
彰德衛及林縣守禦千戶所各收庫預備官兵領用牛
副使陳僉事等各部下官兵奪獲盜甲槍刀弓箭挨牌
等器械俱發潞州貯庫備用搜獲頭畜贓物除牛副使
賞軍公用外其餘變賣價銀貯庫俱作正支銷山西官
兵混斬郭文深郭文禮等首級一十四顆俱查給屍親
郭演等認領埋塋各處官兵斬獲首級耳記已經各該
委官紀驗明白照例俱發各該官司轉發被害地方懸
掛示衆招降男婦俱經解發原籍官司安插監故陳良

等俱已差人相埋訖申川該納贖罪米七石照例折穀
又該納官紙張景隆趙清俱民紙各一分每分照例八
分折穀二分本色俱發潞州各照數追完穀納官倉備
賑紙張收候公用取倉庫實收領狀繳照其張法張玘
等該納紙分審據各犯執稱貧難免追知縣蹇賢張友
直判官項鑽吏目董光祖縣丞何應漢典史何智翟儒
林祁士漢倉官賈文俱在任犯罪去任事發依律免究
都指揮霍錦李鳳鳴指揮魯宣等千戶楊鈺宋琳等百
戶黃金楊臣等知州郭鏗王朝雍知縣張巍州同知倪
最吏目張雲鵬夏瀛洲主簿謝景安朱璽典史吳淮張

本沙考言
鐘千戶牛賓與在逃通判楊良臣俱另行吊來各衙門
文卷發回備照等因會招備呈到臣會同山西巡撫劉
大謨山西巡按王朝用河南巡撫潘墳河南巡按胡效
才覆查相同除將各該領兵大小官員擒斬收降功次
輕重等第造冊奏繳外叅照先巡撫山西今閑住常道
以風憲大臣當拊循重任既不克拯凋瘵以牧善良又
不能宣威靈以戢姦宄徒以盜賊小警輒干朝廷大兵
不勝貪功喜事之心殊無禦侮應變之略輕舉妄動爲
國生事卒之勞師費財損威傷體追原致患之本實因
首議之非都督魯綱身爲大將手握重兵五月奉命而

八月啓行遷延孰甚嬰城坐守而縱賊出沒怯懦有徵
及至進兵到山之時已在河南敗賊之後生擒二十三
人盡屬監故寧免無冤斬首二十顆皆不知名難保非
妄况先前請兵之奏已涉虛張而後來報捷之文又不
從實有負帥闡之寄殊非統制之材以上二臣俱爲有
罪相應黜罰以爲文武重臣不職之戒爲照河南巡撫
潘墳經濟有文折衝能武坐授方略而善於用人動中
機宜而長於料敵明約誓以協羣師布寬令以全脅誘
竟致諸軍用命一鼓成擒嘉乃忠勞功宜君最相應陞
賞以勵臣工副使翟瓚總領哨兵深入重險躬擐介冑

右沙秦言
首破賊巢所在結聚之徒一時披靡而下推原克捷之
效實著先登之勞副使牛鸞先期遇敵首剴賊鋒勒營
要衝分兵深入頗彰不殺之信卒致收降之多僉事陳
大綱兵力獨盛聲威素揚不事窮誅盡降首惡久鬱平
寇之略竟收得雋之功以上三臣論功爲上相應優賞
以旌其能河南右叅政陶諧守據隘口振揚兵威督率
奇兵邀遮賊路身雖當乎一路謀實贊于諸軍僉事溫
濡督令奇遊擇守險要獨勤調度多所擒降久勞師旅
之間大爲地方所賴僉事祁鶴監兵督餉隨陣紀功旣
無缺乏之虞亦鮮冒虛之弊諸哨克捷咸與有功都指

揮僉事徐溥英勇有謀步占奇驗督選鋒於前哨贊成
筭於中軍不避險難身先士卒以上四臣功俱可錄相
應嘉賞以酬其勞山西右叅政李際可僉事楊朝鳳原
係該道守巡屢經失事一向住俸戴罪供事但曾經會
議撫處不肯輒開兵端卽此一節未爲失謀制於撫臣
事多掣肘罪坐所由情皆可亮况李際可勞於饋餉頗
竭心思楊朝鳳勤於紀功亦多贊畫近日賑濟貧民處
置地方屢次入山奔走勞勩觀其小心畏謹原非僨事
之人所據後功足掩前失以上二臣則功多過少相應
准贖更須量賞以獎忠實山西都指揮霍錦徒擁壯武

之軀素乏謀勇之略舍夷冒險致折官軍素多輕敵寡
謀首失事機非小但近日頗知懲創隨軍獲有微功祗
應未減以示勸懲再照河南彰德衛指揮吳捷李塘丁
始然梁文鄭存千戶胡宣百戶蔡堂許爵鄧賢李賢陳
州衛指揮陳厚千戶張寅白相百戶達九思楊盈歸德
衛百戶常永張堂守備都指揮王秉彝郭舉宣武衛指
揮毛世威千戶郭璽懷慶衛指揮薛守直睢陽衛指揮
湯卿余尙用于宗仁儀賓郝世昌湯陰縣知縣鄺奉主
簿白鎮陰陽官李伸衛輝府檢校金鳳翔彰德府檢校
雷雲以上各官俱河南副使翟瓚叅政陶諧僉事溫濡

都指揮徐溥部下之有功者也山東青州衛指揮查瑤
山西振武衛指揮曾宣太原左衛指揮胡廣太原右衛
指揮李承祖潞州衛指揮莊文柴山臧鉞沁州守禦千
戶所副千戶何緒羽林前衛指揮馬璽應永羽林衛指
揮葉堂河間衛指揮宋葵達官指揮孔璋千戶高盤潞
州同知倪鼓澤州判官張澍壺關縣知縣江東典史吳
淮平陸縣主簿尹塘高平縣典史張鏜沁州吏目夏瀛
洲以上各官皆都督魯綱山東副使牛鸞山西僉事陳
大綱都指揮霍錦部下之有功者也中間如河南之李
塘吳捷郝世昌等督率軍兵乘危奮勇雖無戰馘之次

而實有衝鋒破敵之功山東之查瑤山西之曾宣既有部下及自擒首惡之功俱當查照功次輕重相應一體賞賚以勵人心但曾宣馬璽部下查有妄殺平民婦女首級吳捷毛世威薛守直部下亦有混殺婦女幼男首級李承祖先前被賊殺死官軍搶去官馬俱屬有罪但各官俱係有功曾宣宜量加罰治馬璽等相應准贖再照汾州知州郭鏗潞州同知倪豉吏目張雲鵬夏瀛洲縣丞何應漢主簿謝景安朱璽典史張鏜係地方官不能及時剿捕衛輝府同知盛時雍知州黃海郭鏗王朝雍知縣張巍係紀驗官混收首級失於當時追究以致

無從查考亦屬有罪但王朝雍郭鏗被虜賊中幾陷不測黃海等紀驗功次頗効勤勞其餘失事人員俱有微功相應准其贖罪及照知縣蹇賢潞州判官項鏞吏目董光祖縣丞何應漢典史何智翟儒林郝士翰倉官賈文俱各失於撫捕但在任犯罪去任事發依律免究及照山西指揮王振鄭麟等千戶朱琳等百戶黃金楊臣朱祿等俱係失於防禦不行奮勇致賊殺死官軍相應提問以警將來再照潞州衛指揮柴山莊文柳勛唐儒千戶楊輔劉璇等俱係緣事官員報効有功所據原犯情罪未擬輕重合行巡撫衙門查照應否准贖徑自施

行及照都指揮李鳳鳴指揮吳捷丁始然同知王都因
聞山西官軍失利各就掣兵回還亦合有罪但李鳳鳴
陞任吳捷等有功相應准贖免究再照在逃通判楊良
臣已故監生李克紀向主招撫之策未爲無見但行於
敵殺官軍之後似於國法有礙頗駭物情然當時有能
善用其謀亦足以潛消旤變良善得以安堵而首惡兇
黨亦未嘗不擒柰何當事之人與之爭功忌其成事卒
使二人避罪就逃憂憤而死但楊良臣原犯贓罪無足
深惜而李克紀齎志以沒似亦可矜合無免良臣追提
之罪許令致仕少酬其取還知州之勞於李克紀略加

卹典以慰其生前報効之志庶明公論以勵人心再照
被賊殺死指揮等官薛朝輝李爵秦洲及陰陽官宋楠
等十一員并軍人賈增宋真等七十七名乞勅該部查
照事例一體厚加優恤以勵死事之臣再照首惡陳卿
本山澤亡命盜賊兇渠劫脅愚氓敢爲叛亂屠戮一家
無罪三人不一而足敵殺官軍動以數十已至再三卒
勞五路官兵坐費十萬糧餉流毒兩省傳聞四方上厯
聖主之憂下軫廟堂之慮惡已盈貫罪通於天及陳奉
等三十餘名皆真正強寇有名賊首罪不容誅但罪人
斯得天誅不可久留伏乞聖明速賜威斷照律處決梟

首以警羣心再照脅虜常得金等五十名俱該臣會審
明白釋放已訖牛子經等男婦二千三百餘名俱經都
御史王應鵬叅政邵錫安插已定多所全活所據二臣
亦應量加旌賞再照兵部原議賞格陛下依擬揭示黃
榜內稱諸色人等有能擒斬陳卿父子及有名賊首的
賞銀三百兩陞三級世襲軍陞實授百戶民陞土巡檢
職事欽此查得原奏有能一人爲首倡率深入賊營招
撫餘類五百名以上者陞實授二級自能招撫三百名
以上者亦陞二級二百名者陞一級一百名以上者陞
署一級連不及數者各賞銀三十兩內文職官員俱照

等則陞級臣謂朝廷立此賞格蓋因叛賊久攻不下將
恐勞師費財故懸示重賞以募非常謀勇之人欲以一
夫之力而致其首惡也今以萬衆之師數道並進糜費
供億何可勝筭而領兵官部下各以數千之衆僅能破
之大勢所克非仗獨能乃欲援此受賞實於格例不合
又况近日招收多係山中居民及婦人小口一槩驅虜
以充招降之數全家係累舉室焚蕩罹此慘酷民實何
辜以此爲功恐非事實除已造冊分別外臣愚欲乞陛
下直當嘉其平賊之功勅下兵部照冊斟酌輕重定擬
陞賞不必引用原日賞格庶於事理不悖賞當其功再

照巡撫山西都御史王應鵬未奉欽依輒已行賞殊非事體但臣訪究守巡等官皆言當時破賊之後入城之時諸路官兵頗爲驕縱囂然求賞山東槍手俱係曠賊其在地地方騷擾尤甚而領兵者不能禁戢且有要挾之言故王應鵬慮有意外迫不得已將京邊官軍及山西山東官兵一槩賞訖今將該州原造賞功銀兩數目文冊另造青冊一本送兵部徑自查議應否奏請定奪再照據潞州造到賞功文冊及河南造到軍餉文冊內查得都督魯綱副使牛鸞除受金花各二枝共折銀一十六兩八錢銀花各二枝共四兩賞功銀牌各一面共銀


六十兩紵絲各二疋綵帳各一幅共折銀二十九兩六錢外又接受盤纏銀各五十兩手帕各五十方大花紬各四疋又查得魯都督入山受銀四十兩牛副使入山受銀五十兩又於河南彰德府經過索受犒賞銀六百三十兩及查得山東官兵賞功銀二千三百兩俱牛副使持去河間官軍賞功銀四百兩俱魯都督持去取獲批單在卷不見給賞下落所據接受盤纏入山銀兩及手帕花紬一節事干行檢况係官庫錢糧合當追究以警貪縱再照御史穆相蔣暘巡歷山西地方先後論列實有隱功相首議撫卒賴其說足以救民命於鋒刃之

餘曷薦諸臣竟用其人以收平寇之績二臣可謂無負耳目之寄有裨廟堂之謨者矣相應酬獎以勵臺賢再照前項山賊醞釀已非一日節年地方官員失於撫捕亦非一人但陳卿原日非盜祇因已故僉事王琳誣坐死罪頗失其情然自脫逃以來遂無藉賴此爲激迫之始至於近年蹤跡愈著自兩次敵殺官軍之後聲勢大張失今不早撲滅將來則有可憂茲者仰賴陛下明照日月威行雷電廟堂決謀將士戮力渠魁旣已授首脅從悉蒙全宥羣情慰悅地方底寧所據諸臣功罪實得於訪勘之真臣誠不敢避嫌辭怨有所容隱以負陛下

當求至公之訓但常道昨於進兵之日尙在地方驅馳兵間頗勤調度向來行事乖刺固亦才識非優亮非有心敢於爲惡綱以武人兵本兇器諸軍四集各欲奮威非賴朝廷仁聲寬令屢布於前則橫羅鋒鏑者尚不止此責以大義罪固難辭惟是四方有事將來用人竊恐寡昧之徒因咽廢食懲羹不自省心方用藉口伏望皇上擴天地之大度軫父母之至慈少假包荒重惜事體書曰罪疑惟輕功疑惟重此聖王用賞罰之大經也臣愚不敢不以爲獻惟聖明留神特賜矜察臣無任戰越俟罪之至

嘉靖八年二月二十六日題奉聖旨該部看議了來說欽此

桂洲奏議卷第四



天祿中平

